


ANTONII

MIZALDI MONLVCIANI

*Zodiacus, siue duodecim Signo-
rum cæli Hortulus: libel-
lis tribus concin-
natus.*

Ad Franciscum Oliuarium
Franciæ Cancellarium.



PARISIIS,

Apud Carolam Cuillard, sub sole aureo, via ad diuum Iacobum.

M. D. LIII.

CVM PRIVILEGIO REGIS.

Μετεωριζόμενος.

Cœlestis cœlum, terram terrenus anhelat:

Præsidet huic Pluto : Iupiter illud habet.

Ἐν πόντῳ ὁ κλεῖς.



Ob. 6:11. 3320

ORNATISSIMO VIRO

Francisco Oliuario Franciæ Can-
cellario, Antonius Mizaldus

Monlucianus.

S. P. D.



*Vm ego à medicis & mathemati-
cis autoribus, ornatissime Cancel-
larie, nuper ad Gracarum histo-
riarũ scriptores, animi gratia, me
conferre, forte fortuna in Herodotũ
percommode incidi: apud quẽ ma-
gna cũ voluptate adnotavi Ama-
sim Aegyptiorum Regem prudentissimum, olim suis le-
gẽ dedisse vt quotãnis apud prouinciã Præsidentem vnus-
quisque ocij, ac vitæ rationem redderet: demonstraret-
que vnde viueret, & quo quæstu sustentaretur. Quod qui
facere detrectaret, præsentem pœnam agnoscebat. Legem
eam postea ab Aegyptiis Solonem ad Athenienses, &
rursum ab his Censorium Catonem ad Romanos trans-
tulisse, ibidem in animum reuocari meum: exemplo sanẽ
omnibus non dicam regnis & prouinciis, sed etiam vr-
bibus singulis, ac viculis magnopere imitabili, & sum-
mẽ obseruando. Cui hodie si locus aliquis daretur, fœli-
citer cum rebus humanis ageretur. Nam quisque in offi-
cio esse satageret, ac artem aliquam tractare meditare-
tur, quã se à pœna solers eriperet, ac inopem vitam se-
dulò defenderet. Vnde, vel tantillum commodi hinc saltẽ
emergeret, quòd in alienas possessiones, imò verò in vitã
omni possessione cariorẽ (sublata è media hominũ vni-*

ueritate quauis inertia, scelerum quorumcumque al-
trice ac parente) sacra nescio qua auri fame, tam frequē-
tes non struerentur insidiæ: nec esset, vt est in prouerbio,
homo homini lupus. ô ter, quaterque beatas Respubl. in
quibus tam sancta lex aliquādo vigebit? ô seculum ve-
rè aureum, in quo Reges, Regūque σὺμβολοι, in hac tā
proba incumbunt studia? vetūsque institutum nouum fa-
cere aggreditur? Sed quorsum rapior? ad me redeo. Cum
itaque in hanc Herodoti historiam verè auream incidis-
sem, mearum partium esse duxi, hoc nouo ineunte anno
(ac si lex illa Amasina hodie locum haberet) ocij, vitæq;
meæ rationem apud te reddere: qui per vniuersum Gal-
liæ regnum, longè latèque fusum, nedum in certa aliqua
eius prouincia, summus Cancellarius haberis, & Præses
omnium supremus. Itaque, quia quam quisque nouit ar-
tem in ea & se exercere, & illius specimen tutò adere po-
test, ex duabus artibus (medica, inquā, & astronómica)
quarum gustum qualemcumque sua benignitate imperti-
re mihi dignatus est largitor ille bonorū omnium Deus
Opt. Max. postremam hīc (nam vtramque coniunctim
alibi) exornandam & illustrandam mihi proposui. Ex
cuius hortulis, etiam media Bruma vernantibus, floscu-
lum hunc tibi hodie concinnare nihil sum cūctatus: tibi,
inquam, quē philosophiæ cælestis, imò vero μαθηματικῶν
omniū apprime studiosum esse, & noui & audiui. Verū
enimvero, cū dicti flosculi, & papiracei munusculi tenui-
tatem, cum sublimitatis tuæ gradu cōpono, animus sanè
meus in diuersa rapitur: adeo, vt de mutāda sentētia, &
euertere cōsilio rationē secū iure ineat. In quo dñ anxius
hæret, ecce illi peropportunè, ceu Deus quispiam ex im-
prouiso (quod dicūt) occurrit, vir doctus æquè, ac huma-
nus

*nus, ANTONIVS MINARDVS in supremo
 Parisiensi Senatu Præses integerrimus, nostrorumq; Bor-
 boniorum decus singulare, & tuarum virtutum, tuique
 candoris prædicator constantissimus: apud quem dum
 instituti mei summam expono, subrusticum pudorem meum
 insigniter obiurgat: diclitans te eum esse ad quem per-
 faciles aditus pateant: quique oblatus eruditorum lucu-
 brationes ultro excipias, etiã quantumvis exiguas: nec
 ullum à tuo conspectu excludas, ac tristem abire sinas.
 Quædum audirem, ex timido audetior ilico sum factus:
 quem enim tanti viri vox non excitet? Cœpi itaque Zo-
 diographicam hanc meam lucubratiunculam, superio-
 rum mensium noctibus aliquot præcipitatã verius quàm
 elaboratam, incudi utcumque reddere: ut in tuo nomine
 sub initia huius noui anni, ΦΙΛΙΑΣΓΟΝΟΜΟΙΣ omnibus ex-
 cuderetur. Hæc si quispiam de corpusculo, & mole sanè-
 quam exigua expendere volet ac metiri, perpusillum o-
 pusculum, & munus valde tenue esse dicet: si de rebus
 quas describit, summè diuinũ, sublime, magnum, ac pre-
 tiosum indicabit. Nos ibi cœlorũ Signa duodecim, suis
 coloribus paucis illustramus: nihil omittentes quod de
 illis dici possit, si Zodiacum eorumdem vectore & au-
 rigam spectas: quem Aristoteles propter diuinam ipso-
 rum Signorum energieam, mortis & vitæ circulum appel-
 lare nihil veretur. Id autem argumenti eò libentius tra-
 ctandum sumpsimus, ut fidem ex nostra Cosmographia
 haud ita pridè lectoribus datã, opportunè liberaremus.
 Reliqua ibidem à nobis promissa intra dies aliquot
 (aspirante Domino) expedituri sumus, modò hæc ut prio-
 ra, doctis & bonis placuisse intellexerimus. Planetas
 dico, siue Planetarum collegium, & Asterismos, seu stel-*

latam ex propriis imaginibus octava sphaera Sylulā.
Quae omnia tam facili methodo sumus cōplexi, ut qui-
vis etiā mediocriter eruditus, quatuor opusculis versus
quingies mille plus minùs capientibus, labore modico
& impensa leui, totum cœleste theatrum & capere, &
perlustrare, animoque circūferre possit: ab infimis enim
ad summa gradatim conscendimus: & hinc immensam
Dei, cœlorū & terræ Architecti incomparabilis sapiē-
tiam, gloriam, & maiestatem omnibus palam exhibere
sategimus. Nec temere mea sententia, nam, ut est apud
regium Prophetā, δι' οὐρανοῦ διηγοῦνται δόξαυ θεοῦ, ποίη-
σι δ' ἐ χειρῶν αὐτοῦ ἀναγγελεῖ τὸ σεβίωμα. Sanè, si ori-
ginem nostram cœlestem facimus, si spiritum nostrorum
corporum formatorem, germen esse cœlestis ignis Gale-
nus posuit: si astro persimilem Aristoteles dixit, nihil vi-
deo homini affine magis, & cognatum esse, quàm cœlū.
Quod qui negat, impiè & Deo & Naturæ Gygantum
more, pugnat: sēque degenerē animam habere palā pro-
fitetur. Nam quæ, per Deos immortales, digniores disci-
plina, aut magis necessaria, quàm quæ in rebus cœlesti-
bus perpetuò versantur? In quo perfectius Dei summi æ-
ternitatem contemplari liceat, quàm in his quæ diuina
sunt, & corruptioni minimè obnoxia? A quo melius in-
effabilem Dei maiestatem, & cætera quæ in rerum natu-
ra stupeſcimus & admiramur colligere dabitur, quàm
à stellarum pulchritudine, Signorum energeia, cœli mo-
tu & vastitate? Habet sanè hac diuina contemplatio,
nescio quid latentis miraculi, imò verò abstrusæ ener-
geia, quæ mentes nostras in sui, & Dei Opt. Max. ad-
miracionem & amorem, abdita naturæ familiaritate,
nō secus rapit, quàm Magnes ferrum. Deo itaque gratias
summas

summas agere debemus, quòd in hac caligine mentis hu-
manæ, aliquas scintillas suæ sapientiæ & diuinitatis in
cælo maximè lucere velit: semelque inuentam cœlestem
philosophiam, ad vsum in vita transferri: ad prænosce-
das anni tempestates, aeris motus, mensũ & dierum ra-
tiones, ad tuendã valetudinem, ad rem nauticam, rusti-
cam, medicam, militarem, & vt paucis multa dicam, ad
quiduis ferè in sublunari orbe perficiendum & auspi-
candum: sed omnium maximè ad celebrandum opificem
Deum. Verùm hæc plus satis, præsertim apud tantum vi-
rum omnigena eruditione illustratum: cuius ocium sum-
mè negotiosum habetur: præsertim hisce temporibus, in
quibus Mars suis furiis comitatus, herredũ nescio quid
fremit. Finẽ itaque facio, à te obnixè petens, ornatissimè
Cancellarie, vt xeniolum hoc qualecunque, hisce Iani ca-
lèdis ex animo tibi oblatũ tam placidè excipias, quàm
libenter exhibeo. Hoc factum si intellexero, conatus meos
ad alia quæ in manibus sunt, & his maiora, ex vmbra
in lucem proferenda, non mediocriter promouebis. Bene
vale. Lutetiæ pridie natalis IESV CHRISTI
seruatoris nostri.

1552.

A iij

ZODIOGRAPHICI

libelli ad Lectorem.

SI tibi prodimus parui, ne despice: paruis
Gratia reb^o inest, ac ingens sepe voluptas:
Nec non & pretium pretio pretiosius omni:
Sic vnguentorum, sic auri pondera parui,
Exuperant pretio permagnos aris aceruos:
Sic adamas punctū lapidis, pretiosior auro
Censetur multo: censetur & vnio iusta
Argenti massa præstantior. Ergo, diserte
Lector, ne in nobis corpus, sed pspice vireis:
Et q̃ magna tibi sub paruo pondere, paucis
Claudamus: cœlis breuitas gratissima res est:
Grata viris doctis q̃ magna negotia tractāt:
In quorū numero primas Oluarius vnus
Agnoscit: rogitas quis? Cancellarius ille
Gallorū: Vrania pius hospes: portus & aura
Doctorū: atq; illinc famâ super æthera not^o:
Ad quē per facileis aditus speramus habere.

*Superata tellus
sidera donat.*

SVMMMA TRIVM LIB. ZOD.

LIBRI TRES ZODIACI, SIVE

*Signorum cœlestium Hortuli, hæc in summa
habent, ac describunt.*

Primus, proponit duodecim Signorū Zodi-
ci, ordinē, sitū, naturā, qualitates, & (vt loquū-
tur) passiones omnes tā naturales, quàm acciden-
tales. Præterea, Signorum triangularitates, deca-
nos, fines, domos, exaltationes, & alia.

Huius præcipua, summæque capita hac dige-
runtur serie.

Breue proloquium cum inuocatione, & dilu-
cida enumeratione rerum toto libro descri-
bendarum.

Zodiaci descriptio, cum nomenclatura & ordine
duodecim Signorū, à quibus ille nomē habet.

Zodiaci natura, situs, & cū latitudine declinatio.

Cur Signifer de omnibus cœli circulis mundum
obliquè circumdet, ac obambulet: multisque a-
nimalibus illustrètur.

Quid Signum Zodiaci, gradus Signi, minutū gra-
dus, secundum minuti, &c.

Signi cuiusq; lōgitudō, & latitudo. Adhæc, quæ nā
Signa terrestria, aërea, aquea, & ignea.

Signa masculina, & calida.

Signa fœminina, & frigida.

Signa diurna, & nocturna.

Signa septentrionalia, & meridionalia.

Signa mobilia, fixa, & communia.

Signa mobilia, fixa, & communia, quomodo qua-
tuor anni tēpestates foueāt, excitēt, ac moueāt.

Signa tropica, siue cardinalia: & cur ita appellētur.

Signa

SYMMATA TRIVM LIB. ZOD.

Signa tropica ante se habere gemina & bicorpora Signa, non absque ratione.

Signorum triplicitates, siue triangularitates : cum earundem qualitatibus.

Signorum cuiusque triplicitatis, Domini tã diurni, quàm nocturni.

Signorum facies, siue Decani: Aliter de eisdem.

Signum Arietis cuius Planete domum, exaltationem, ac depressionem exhibeat.

Signum Tauri cuius, &c.

Signum Geminorum cuius, &c.

Signum Cancri, cuius, &c.

Signum Leonis, cuius, &c.

Signum Virginis cuius, &c.

Signum Libræ, cuius, &c.

Signum Scorpj, cuius &c.

Signum Sagittarij, cuius &c.

Signum Capricorni, cuius &c.

Signum Aquarij cuius, &c.

Signum Piscium cuius, &c.

ADMONITIO pulcherrima in præcedentia.

Signum Zodiaci vnumquodque, quibus stellis, quot, & quantis circumscribi, & figurari ab Astronomis censeatur.

Signum Zodiaci quodlibet, quando inauspicatũ, ac nocens dicatur, & contrã.

Signa aliquot contrario modo & figura, quàm alia supra Horizontem ascendere, ac descendere: & quid hoc portendat.

Signa quædam in Zodiaco humana esse, alia verò ferina: non absque ratione & exemplo.

Signa

SVMMATRIVM LIB. ZODIACI.

Signa humana à ferinis vndique in Zodiaco obfideri:& quid illud significet.

Signa fœcunda,& prolifica.

Signa sterilia,& item mixta.

Signa recifa,duplicia,& bicorporea.

Signa muta,& loquacia.

Signa currentia.

Signa fessa,& pigra.

Signa iacentia.

Signa recta.

Signa membris fraudata:fiue (vt loquuntur) imperfectorum membrorum.

ADMONITIO in superiora,pro iamdictorum
significatione.

Signa in Zodiaco hærentia, ac se contingentia:
Adhæc conuenientia,& dissentientia: cum his
quæ deorfum præfigurant.

Signa aliquot gemina, & bina in cœlo haud quam
temere collocata effe.

Signa quædam in Zodiaco nuda effe: & quid de-
orfum mortalibus significant, ac præmōstrēt.

FINIS LIBRI PRIMI.

SEcundus liber recenset Signorū Zodiaci ex-
sortus & item occasus. Adhæc, eorundem aspe-
ctus & radiationes inter se: cū partibus Signiferi
quæ Lunæ peragrationes, siue (vt vulgò loquūtur
Astronomi) mansiones octo & viginti consti-
tuūt. Aſcribit inſuper Signis Zodiaci, quatuor an-
ni partes, ac tempeſtates: eaſq; propriis coloribus
depingit:cū Signo partis cuiuſq; duce,& aſpice.
Mundi

Múdi præterea regiones, præcipuasq; prouincias,
ex priscorú nomēclatura, singulis Signis distribuit.

Huius præcipua summaque capita, hæc digeruntur serie.

Q Vid Signum in vtroque sphæræ situ rectè,
vel obliquè oriri.

Signorú ascensiones, & descensiones, siue
astronomici exort^o & occasus in recta sphæra.
Signa tardè & velociter ascendētia ac descendētia
in obliqua sphæra, seu decliui.

Signa sex quouis tempore supra terram esse, & totidem
sub terra.

Signorum exortus & occasus triplex: iuxta poëticam
ac vulgatam acceptionem.

Signorum, & partium Zodiaci aspectus inter se
necnon radiationes. Et primùm quadrangularis,
deinde triangularis, cum vtriusque natura
& viribus.

Signorú aspectus sexāgularis, siue sextilis, & hexagonus:
cum propria illius natura & viribus.

Signorú aspectus oppositus, ac ei^o natura & vires.

Signorum oppositorum nomenclatura cum partibus
anni quæ illis respondent.

Signa opposita quando, & quomodo amica, vel
inimica dicenda.

Signa dextra & sinistra, ex quibus aspectus tam
dextri, quàm sinistri colliguntur.

Signorú inimicitie, & concordie penes aspectus,
iuxta vulgatum Astrologorum modum.

Signorum Zodiaci partes, seu tractus octo & viginti,
quos prisci Astronomi Lunę mansiones,
siue

SUMMA TRIVM LIB. ZOD.

siue peragrationes dixerunt. In quibus dum Luna versatur, inferiora hæc, & maximè aërem, variè exagitat.

Signum Zodiaci à quo Ver Astronomis initiatur: cū ppria eiusdē Veris descriptione, ac natura.

Signum Zodiaci à quo Aestas Astronomis initiat, cum propria &c.

Signum Zodiaci, à quo Autumnus &c.

Signum Zodiaci, à quo Hyems, &c.

Signa tria vnicuique dictarū tempestatum anni deputari.

Ab Ariete, siue ab Aequinoctio vernali, gētes plērasque suum annum olim incoasse.

A Cancro, siue ab æstiuāli Solstitio gentes, &c.

A Libra, siue ab Aequinoctio autūnali, gētes &c.

A Capricorno, siue à brumali Solstitio, gētes &c.

Signa Zodiaci cū suis Planetis, quos vētos excitēt.

Signis Zodiaci, septem mundi climata subiici, & ascribi: propriosque ibi duces, rectores, ac dominos habere.

Signis certis Zodiaci, ac item Planetis vnāquāq; orbis terrarum regionem subiici: vnde scilicet, tot & rerum & figurarū varietates, ac particulares proprietatum distributiones, & motus.

Signo Arietis subditę regiones, ex priscorum nomenclatura.

Signo Tauri subditę regiones.

Signo Geminorum subditę regiones.

Signo Cancri subditę regiones.

Signo Leonis subditę regiones.

Signo Virginis subditę regiones.

Signo

Signo Libræ subditæ regiones.

Signo Scorpionis subditæ regiones.

Signo Sagittarij subditæ regiones.

Signo Capricorni subditæ regiones.

Signo Aquarij subditæ regiones.

Signo Piscium subditæ regiones.

Signorū triplicitates fœdere tacito decreta cœlestia omnibus regionibus quas subiectas habēt, ex æquo communicare. Adhæc regiones regionibus, vt Signa Signis alicubi conuenire, alibi verò dissentire.

Signorum Zodiaci decreta, vti etiam Planetarum ob regionum situs, ac naturas plærumque impediri, ac mutari. Ex quo varia, variis locis cōceduntur, quæ aliis negantur planè.

Signa Zodiaci hominum membris attributa: & quando morbos, aut vitia portendant.

FINIS LIBRI SECVNDI.

Tertius liber expedit astrologica quædam & γενεθλια λόγια de duodecim Signis Zodiaci natali hora exoriētibus: iuxta priscorū, & recētiorū cœli philosophorū obseruationes: vnà cū his, quæ natis sub illis in vita plurimū præfagiūt, ac significant: cū multis aliis legēdis potius quàm aspernandis.

Huius præcipua, summaque capita hac digeruntur serie.

Signa Zodiaci suam pacē, suaque bella habere: quæadmodū homines qui sub illis nascuntur.

ADMONITIO in iam dicta.

Signa mobilia quæ studia, quæve artes, & sensus natis

SVMMMA TRIVM LIB. ZOD.

natis sub se concilient.

Signa fixa, quæ studia, quâsve &c.

Signa communia, quæ studia, quâsve &c.

Signum Zodiaci quodlibet quas artes particulatim habeat: de quæ sua natura & imagine deorsum agnoscat.

Signa cœli (vti etiam stellas) suas eclipses , & luminum actionumquæ priuationes (saltem ad tempus) habere . Quod vnum , res mundi huius inferioris quæ ab illis pēdent, & experiuntur, & sustinent.

Signum Arietis in alicuius natiuitate ascendens, vel horoscopū constituens, quid nato plurimū hic portendat:& quos illi mores impingat.

Signū Tauri in alicui⁹ natiuitate ascēdēs, vel &c.

Signum Geminorum in alicuius natiuitate &c.

Signum Cancri in alicuius natiuitate &c.

Signum Leonis in alicuius natiuitate &c.

Signum Virginis in alicuius natiuitate &c.

Signum Libræ in alicuius natiuitate &c.

Signū Scorpj in alicui⁹ natiuitate ascēdēs, vel &c.

Signum Sagittarij in alicuius natiuitate &c.

Signum Capricorni in alicuius natiuitate &c.

Signum Aquarij in alicuius natiuitate &c.

Signum Piscium in alicuius natiuitate &c.

Signa Zodiaci humanos facientia, necnon manufectos, & contrā.

ADMONITIO in iam dicta.

FINIS LIBRI TERTII,
& vltimi.

LIBER PRIMVS ZO- diaci, seu Hortuli duodecim Si- gnorum Cœlestium, auto- re Antonio Mizaldo Monluciano.



*I*cego Zodiaci stellatas vndique
formas

PROPO-
SITIO.

*Perspicua methodo describo: ex
ordine tradens*

*Quot sunt quæ rutilant obliquū
Signa per orbem:*

*Cum Phœbo, alternis volucrem portantia Lunam:
Atque alia aduerso luctantia sidera motu,
In primum (veluti ex Sphæra monstrauimus antè)
Quas vireis habeant: quid agant: moueantq; deorsum:
Et quis cuique locus: qualis natura: quid hoc est,
Vnde homines, stirpes, pecudes, ær, mare, terra,
Concipiunt motus: quo pergant tramite cuncta:
Quid proprium teneant: & quid memorabile seruent:
Nam scripsere in eis prisci miranda latère:
Ac vitam, & mortem rebus spirare quotannis:
Quando per illa suo spaciantur sidera motu.
Sed frustra hic operam nauabo, sis nisi mecum
Vranie: cœtus cœlestis prouida custos:
Ergo ades, & facilem te paruo trade Poetæ:
Egregium decus est tentantem summa, iuuare.*

INVO-
CATIO.

B Zodiaci

ZODIACI LIBER PRIMVS.

Zodiaci descriptio, vnâ cum ordine & nomenclatura duodecim Signorum quæ vehit, & à quibus nomen habet.

NARRATIO.

Signorū
duodecim
Zodiaci,
ordo &
nūcupatio

Occupatio
ad petitionem.

Zodiacus proprio dixerunt nomine Graij,
Quem Latium vera, & certa ratione vocauit
Orbem signiferum: nam bis sex sidera portat:
Signa fere cunctis vulgari reddita voce.
Quod bene significant quid cælum mittat, agátue
Aera per liquidum in res terra, & corpora nostra:
Laniger est primum, stellato vellere fulgens:
Quem sequitur radians prostrato corpore Taurus:
Post, Gemini incedunt speciosa lampade clari:
Deinde vehens aestum, & feruentia tempora Cancer:
Subter quem rabidi splendet fera seu Leonis:
Cui facilem comitem se præbet candida Virgo:
Sub pedibus spectans mirando lumine Libram:
A qua pertrahitur lucenti Scorpius astro:
Mox & ab hoc Cheiron, rutilo spectabilis arcu:
Post quem barbato Capricornus obambulat ore:
Quem non inuitus sectatur Aquarius: ambos
Deducens post se gemmato corpore Pisceis.
Sed fortasse petis, cur hæc sint Zodiaci Græcis
Inscripta, & variis passim depicta figuris?
Præterea, cur sint illic tantum duodena?
Et cur disparibus stellis, ac lumine constent?
Causa est longa nimis, alioq; docenda libello
Sedorsum, cum multis, quæ hîc visum est iure tacere:
Si patiens fueris, cum tempore cuncta reponam:
Ni fortuna meos conatus impia turbet.

Zodiaci distributio in gradus secundum longitudi-
nem & latitudinem. Adhæc, quæ sit eius natura, si
tus

AVTORE ANTO. MIZALDO.

tus, necnon obliquitas ac declinatio.

Regia diuorum rutilans, ac aula Dearum
Signifer, interitus rerum, vitæq; volumen:
Accipit in longum ter centum ex ordine parteis
Ac sexagenas: in latum solus, & vnus
Octo bis, vt doctis visum est: hic tramite certo
Obliquat sese in Libyen: vnde horrida Bruma
Aduentat: secatur hinc medium curuatus Olympum:
Qua de parte nouum spirat Ver: inde volutus
In Boream: vnde Aestas flauentia demetit arua:
Hinc rursus medium repetit sinuatus Olympum:
Autumnus paribus qua tempora diuidit horis:
Atque iterum ad Libyæ hinc sitientes flectit arenas:
Venerat vnde prius, necnon inceperat ire.

Zodiaci
partes in
longi, &
latum.

Declina-
tio.

Cur signifer de omnibus cœli circulis mūdum ob-
liquè circundet: multisq; animalibus illustretur.

Signiferum obliquis circundare flexibus orbem
Vna hominum voluit, diuumq; aeterna potestas:
Quò variæ rerum species, quò tempora rebus
Certa forent: adstringat Hyems: Ver stricta relaxet:
Concoquat Autumnus quod & ante parauerat Aestas.
Qui si directus staret, Sol semper, & astra
Confinilem cursum facerent, similemq; tenerent
Vsq; locum: ac radios similes, & semper eosdem
Proiicerent: ex quo rerum sequeretur vbique
Forma vna, ac anni facies, & temporis vna:
Non absque insigni iactura rerum, hominumque.
Idem, bisseis passim variata figuris:
Signa rebit: pecudes, pisces, armenta, virósque:
Hic vt cuncta suos videant ortus, videantq;
Occasus: rerumq; vices, ac fata ferenda:

Zodiacū
circulum,
nō temere
obliquū
esse.

Vide par-
tē p̄p̄ta no-
stra, siue
Ephemer.

ZODIACI LIBER PRIMVS.

aerías: &
Cometo-
graph.

Vt nobis alio monstratur rite libello.

Quid Signum Zodiaci, gradus Signi, minutū gra-
dus, secundum minuti, &c.

Signum, Zodiaci pars est trigesima: prout sunt
In toto partes ter centena, ac decies sex:
Et Signa in totis duodena his partibus: ergo
Terdenis gradibus Signum distinguitur: atque
Bis tricena gradus recipit, clauditq; minuta:
Sexagena secunda tenet quodcunque minutum:
Et sexaginta fert tertia quodque secundum:
Cetera crescendo sexagenarius explet:
Vt monet ars, ac causa iubet, deponit & ordo.

Signum.
Gradus.
Minutū.
Secundū.

Signi cuiusque longitudo, & latitudo. Adhæc, quæ-
nam Signa terrestria, aquea, aerea, & ignea dicantur.

Triginta gradibus longum, latum duodenis
Quodlibet est Signum: terrestria sunt, Capricornus,
Taurus, & Erigone: sunt aeris hæc tria, Libra
Aquea. Hydrochous, Gemini: naturam seruat aquarum
Piscibus, & Cancro similis Nepa: quæ tria restant,
Ignea. Ignea sunt, Aries, Cheiron, Leo denique candens.

Signa ter-
rea.
Aerea.
Aquea.
Ignea.

Signa masculina, & calida.

Mascula sunt Aries, Gemini, Leo, Libra, Sagitta:
Necnō fusor aqua: quibus est calor additus vnâ.

Signa foeminina, & frigida.

Signa hæc foemineam cognoscunt frigida sortem:
Bos, Cancer, Virgo, Capricornus, Scorpio, Pisces.

Signa diurna, & nocturna.

Te valde cupio nocturna, diurna q; Signa
Quæ sint prospicere, & propria deducere lege:

Non

AVTORE ANTO. MIZALDO.

Non tenebris, aut luce suum per agentia cursum:
Nam commune foret cunctis hoc ordine nomen:
Frigida sunt nocti, calida auctorata dici.
Sunt quibus esse diurna placet, quæ mascula surgunt:
Et nocturna, suum quæ s nomen sœmina tradit:
Signa diurna aliis, sex sunt quæ prona sequuntur
Lanigerum: sex à Libra nocturna putantur:
Illic, quòd lucis Phœbus producere pergat:
Hic nocteis: tibi sit potior sententia prima:
Quam clari Astronomi scribunt, laudantq̃, probantq̃.

Quid Si-
gnū diur-
nū, & no-
cturnū ex
multorū
sentētia.

Signa septentrionalia, & meridionalia.

I Pse. Aries, Taurus, Gemini, Cancer, Leo, Virgo,
Affectant Boream, verguntq̃, Aquilonis ad oras:
Signiferi possum si spectas: quò fit, ut illa
A doctis meritò borealia Signa vocentur:
Hic ubi sit terra Phœbus, nobisque propinquus:
Quæ post hæc veniunt, sunt Austri Signa, Notique.

Signa sex
borealia,
& totidē
Australia.

Signa mobilia, fixa, & communia.

Mobilia hæc, Aries, Cæcer, Libra, & Capricornus:
Fixa, Leo, Taurus, Nepa, cū Ganymede feruntur:
Sunt Gemini, Cheiron, Virgo communia Pisces.

Iam dicta Signa quomodo quatuor anni tempestates
excitent, foueant, ac moueant.

L Anigero pecori est vis mobilis: est sua Tauro
Vis constans, solidum robur, stabilisq̃, potestas:
Vis media est Geminis, utroque à sidere ducta,
Communisque vigor: quod cetera Signa sequuntur
Ordine nexa suo per parteis vndique ternas:
Quæ tempestates componunt quatuor anni.

Collatio
tēpestatū
anni cum

ZODIACI LIBER PRIMVS.

Signis à
quibus cō
stituūtur.

*Temporis hinc verni quadrupes Nephelcius autor
It properans: sempérque suas festinat ad herbas:
Nec mora, nec requies: manet ad præsepia Taurus:
Ver manet: insistit bos indefessus aratro,
Incumbens operi: incumbit quoque purpureum Ver,
Per syluas, per prata, & cœpto perstat in ipso.
At Geminis modus est, dum Ver declinat, & ardens
Procedit cœlo indomitis feruoribus Aestas:
Da simile in reliquis Signis, & partibus anni:
Ne, dum cūcta sequor, videar nimiusque, loquaxque.*

Signa tropica, siue cardinalia, & cur ita appellentur.

Tropica
Signa vn-
de dicta.

H*ic te percipiam memori bene mente notare,
Quattuor opposita facie gradientia Signa:
Aequo diuisum quibus est discrimine cœlum:
Lanigerum dico, Libram, Cancrum, & Capricornum:
Quæ tropica appellant: quod in illis quattuor anni
Tempora vertantur Phœbo huc veniente: nouamq;
In faciem mundus sese conuertat, agátque.*

Signa tropica, ante se habere gemina & bicor-
porea Signa: non absque ratione.

Pulchra &
notatu di-
gnissima
de tropi-
cis, & bi-
corporeis
Signis.

N*on frustra duplici formantur imagine Signa,
Quæ tropica in quouis præcedunt cardine mundi:
Nam duplices retinent sociato corpore vires:
Sic præcurrentes Cancrum Gemini, duo sese
Præbent: quorum alter florentia tempora Veris
Efficit: Aestatem sitientem prouehit alter:
Nudus vterque tamen sentit quia vterque calorem.
Sic ipse Arcitenens (qui te Capricorne deorsum
Prospectat) duplici formatus imagine fertur:
Humanas parteis Autumnus morbifer ambit:*

Tristis

*Tristis Hyems, sterilisque sibi deposcit equinas:
Quosque Aries præ se mittit duo, corpora, Pisces
Bina ferunt: Hyemem hic claudit, Ver inchoat ille.
Quinetiam Erigone binis numeratur in astris:
Quæ Libram tropicum Signum præcedit eundo.
Nec ratione caret: nam spicam porrigit Aestas:
Dives & Autumnus de casta Virgine surgit.*

Signorum triplicitates, siue triangularitates, cum earundem qualitatibus, ac temperaturis.

Est apud Astronomos ternis proportio Signis:
Ignea triplicitas, Aries, feruens Leo, Cheiron:
Terrea, cum Tauro Virgo, necnon Capricornus:
Aeream faciunt Libra, Vrniger, atque Gemelli:
Scorpius, & Pisces retinent, vt Cancer, aquosam.

Zodiaci
triplicita-
tes qua-
tuor.

Signorum cuiusque triplicitatis Zodiaci Domini, tam diurni, quam nocturni.

Quattuor hæ τριπλῆς, vel (si vis) triplicitates,
Sub denis gradib⁹ Dños sibi fædere seruant
In quouis Signo: veluti nunc ordine pandam:
Prima, die primis gradibus denis habet alium
Solem: dēinde aliis venerandum, nocte, Tonantem:
Extremis, rigidum Saturnum in nocte, diēque.
Alterā, per lucem est Veneris, sed nocte Diana:
Cui Mars participem se iungit tempore utroque.
Tertia Saturnum dum lux est: nocte, reposcit
Hermetem: subscribe Iouem noctūque, diūque:
Quarta fouet Martem noctu, Venerēque diurno
Tempore: quēis Lunam comitem da, nocte, diēq³.

Triangu-
laritatum
Zodiaci
ordo, cum
earundem
præfectis.

Signorum facies, siue Decani.

Sunt Signis facies, quas appellare Decanos

ZODIACI LIBER PRIMVS.

*Præstaret, gradibus quia denis quæque recurrit:
Has ego te methodo, paucis (aduerte) docebo:
Insuper illarum reges, dominosque Planetas.*

Signorum Lanigeri prima est facies, primusque Decanus
Decani si Mauoris: Phæbiq³ sequens: Veneris quod abundat:
ue facies. Sic Tauri est prima Hermetis: Lunaq³ secunda:
Tertia Saturni: Geminorum prima, Tonantem
Agnoscit: post hanc dabitur Marti altera: deinceps
Qua venient, reliquis sacrare memento Planetis,
Ut sunt in cælo: facilis res, atque probata.

Signorum fines, siue termini.

T*Raduntur Signis nonnulli denique fines,
Qui certas stellas retinent, dominosque Planetas:
Hos ego, te ex doctis cuperem perdiscere libris:
Nam res non levis est, & amat compendia cælum:
Addo, quod hinc nequeunt scribi omnia versibus aptè.*

Signum Arietis cuiam Planetæ domum, exaltationē, ac depressionem, seu casum exhibeat.

L*Aniger eligitur generosi regia Martis,
Et solium Solis: quo instè, ac rite quotannis
Et rerum generi, atque hominum bene consulit orbi:
Ille idem aduerso Signo premiturque, caditque:
Quod reliquis (ne quid repetam) dabis inde Planetis.
Nam parte opposita solio, descendere pergunt.*

Signum Tauri cuiam Planetæ, &c.

P*incipio, Cytherea domum, dulcēsque recessus,
Et Phæbe solium, soliūque insigne superbum,
In Tauro posuere: illic nam regia iura
Exercent: sociæque tenent ditione tribunal.*

Signum

AUTORE ANTO. MIZALDO.

Signum Geminorum cuinam &c.

IN Geminis patriamque domum, charosque penates
Ipse sibi statuit volucer Cyllenius: hic se
Agnoscit: proprias & Signo accommodat arteis.

Signum Cancri cuinam &c.

LVna domū, & cathedrā sibi Iupiter optimus esse
In Cancro voluit, prope sacra palatia Solis.

Signum Leonis cuinam &c.

PHæbus percipiens se iungere rite sorori:
Sedulus in valido fixit sua Signa Leone:
Hicque domum struxit gemmis auroq; coruscant:
Impatiens consortis: ut est suprema potestas.

Signum Virginis cuinam &c.

MErcurius gaudet specioso lumine vultus
Astræ: quapropter ei datur hospes amicus.

Signum Libræ cuinam &c.

IN Libra, stupido pulcherrima Cypria quondam,
Saturno solium, necnon sibi condidit ades.

Signum Scorpij cuinam Planetæ &c.

SCorpius exposuit Marti sua lustra superbo:
Cum quo non alium voluit regnare magistrum.

Signum Sagittarij cuinam Planetæ &c.

Centaurus Iouis est præfulgida regia summi:
Cui nec adest socius, nec consors hic datur alter.

Signum Capricorni cuinam &c.

TV Capricorne seni Saturno tecta, larēque
Das: & Mauorti solium omni sanguine fœdum.

Signum

ZODIACI LIBER PRIMVS.

Signum Aquarij cuinam &c.

In te Saturnus sedem sibi ponit Aquari
Solus: nam comitem rigidus non sustinet vllum.

Signum Piscium cuinam Planetæ &c.

Pisces sūt Veneris cathedra, & dom^o ampla Tonātis:
Hospitium fœlix: nam est hospes ab hospite tutus.

Admonitio pulcherrima in iam scripta.

Si verum narrant, qui scribunt, cuncta deorsum
Quæ fieri debent, sursum retinere figuram:
Hic tibi proponam paucis pulcherrima: primum
Cernis vtrique domos Solis, Lunaq³ superbas
(In quibus esse solet regina, & regis imago)
Mercurium eloquij patrem stipare: quod vnum
Summos vsque viros, & magna exempla daturus
Admonet, vt secum teneant, foveantq³ peritos:
Nec quocunque modo propriis patiantur abesse
Aedibus: vt profint, doceant, vigilantq³, iuuentq³.
Audis præterea, quod habet doctissimus idem
Mercurius, proprias ades, Iouis ex diametro
Oppositas tectis: qui largus fingitur auri
Esse dator: quæ res demonstrat, & indicat, omnes
Qui vel doctrina, vel quacunque arte valebunt,
Raros prouentus, nummos, & opes habituros:
Quod pater ingenij præuè spectetur ab auri
Largitore: potes simili deducere forma

Philoso-
phica, &
summè no-
tanda de
domibus
Planeta-
rum.

Breuitas
cū perspi-
cuitate au-
thori fami-
liaris.

Ex modò descriptis quamplurima: quæ tibi cogor,
Festinans aliò, iustè reticere: libenter
His horas aliquot, per libera tempora, posthac
(Si tibi quæ scribo cognouero grata) daturus.

Signum

AUTORE ANTO. MIZALDO.

Signum Zodiaci vnumquodque, quibus stellis,
quot, & quantis circumscribi & figurari ab A-
stronomis censeatur.

Quot stellis constet Signum quodcunque, quibúsue,
Et quantis, satagam facili monstrare Minerva
De proprio libro: dum formas, atque figuras
Octauæ Sphæræ conabor pingere ad vnguem:
In quibus suis castris ad tempora figere nostra:
Et cælo, ac terris æquata reddere lance:
In quo rite meum claudam hoc cœleste theatrum:
Mille quater structum & quingentis versibus: intra
Septenos mensis, nocturnis scilicet horis:
Dum fortè à rebus medicis, medicis quoque libris,
Ac aliis, mihi cessandi est concessa potestas:
Atque calor vegetus iuuenili in corpore feruet.

Signum Zodiaci quodlibet, quando inauspica-
tum dicatur, ac nocens: & contrà.

Signum quod calcat quicumque Planeta malignus:
Aut in quem radios iaculatur fronte minaci,
Inde trahit vitium, multoquē nocentiùs afflat:
Contrà, quod fœlix: quæ res nos admonet vna,
Quòd rectos mores ledunt consortia praua:
Emendantquē malos, bona: ni mentitur Apollo.

Signa aliquod cōtrario modo, quàm alia supra
horizontem ascendere, & parte opposita cadere
(si corporis formam, ac imaginem spectas) &
quid illud demonstret.

Sunt tria Signa, nouem reliquis pugnantiâ, forma,
Atque modo vario incedendi: respice Taurum
Clunibus, & Geminos pedibus, testudine Cancrum
Surgere: cum rectis oriantur cetera membris:

Ne mirere

Signū fau-
stum & in-
faustum.

Signa nō
vno mo-
do per Zo-
diacū in-
cedere.

ZODIACI LIBER PRIMVS.

Philoso-
phica, &
pulchra.

*Ne mirere modum, nam Sol auersa per astra
Æstiuum tardis attollit gressibus annum:
Atque moras nectit longas per talia Signa.
Est aliud tamen hoc (me iudice) cuique notandum:
Nimirum, quod erunt homines quos surgere in altum,
Ad summósq; gradus, & honorum culmina summa,
Auerſo reptare modo, sine lege videbit
Mundus: constanterq; feret: cælo quia sic stat.*

Signa quædam in Zodiaco humana esse, alia ve-
rò ferina: non absque ratione, & exemplo.

Signa hu-
mana in
Zodiaco.

S Ignifer humanis Signis duntaxat habetur
Quattuor illustris: Geminis & Virgine, necnon
Vrñigero: quæ parte vna addes Arci tenentem:
Quæ superant octo, dicuntur Signa ferina.
Sed fortasse petes, quorsum tot Signa ferina
In cælo, & tam pauca humano prædita vultu?
An quod nos voluit summa, & diuina potestas
Noscere, quod plures brutales, atque ferinos,
Indociles, sæuosque, malos, & ledere promptos,
Inferior mundus (qui se speculatur in astris)
Gestabit: quàm compositos virtutibus, atque
Humanos, dociles, placidos, mitēsque, bonosque?
Qui prodesse velint cunctis, offendere nullum:
O rem mirandam cælum? ô mysteria digna
Omnibus exponi, quibus hærent optima cordi?

Philoso-
phica & e-
gregia.

Signa humana à ferinis vbique in Zodiaco ob-
sideri: & quid illud significet.

Signa fe-
rina in
Zodiaco.

Quæ sunt in cælis humano condita vultu
Signa, manent formis vtrinque obsessa ferinis:
Sic nudi Gemini, à Tauro, Cæcroq; premuntur:

Et

AVTORE ANTO. MIZALDO.

*Etrursum à Capro cornuto, & Piscibus, vnus
Vrniger: à sauo castissima Virgo Leone:
Sic Cheirona Caper, necnon & Scorpius vrgent.
Si petis, hac quorsum? paucis monstrare studebo:
Vt genus humanum, sancta & cœlestis origo,
Condiscat variis se casibus esse, malisque
Expositum: atque ad pauperiem vel lege vocatum
Naturæ: veluti ex speculo monstratur in astris.*

Signa fœcunda & prolifica ex priscorum
traditionibus.

Philoso-
phica &
pulchra.

V*Tres cœlorum facili gustare labello
Possis: ecce tibi, & rara, & vulgaria scribo:
Fœcundum propriè est Cancri genus: acer & ictu
Scorpius: & partu complentes aquora Pisces.
His ergo in Signis natali tempore, quisquis
Summum rectorem genesis, dominumve videbit,
Multa prole parens fiet: modò cætera constant.
Causas nos alibi pergemus querere: necnon
Multorum, passim quæ libris tradimus istis:
Si Deus hos nobis iuueniles proroget annos:
Et factum satis hîc à me tibi dixeris esse.*

Signa tria
fœcunda.

Signa sterilia, & item mixta atque ambigua, ex
priscorum traditione.

E*St Virgo sterilis, sterili coniuncta Leoni:
Nec capit, aut captos producit. Aquarius ortus.
Inter vtrumque volat Capricornus frigore notus:
Et qui contento fulget Centaurus in arcu:
Est Aries mixtus: qui aquantem tempora Libram
Ac Geminos, Taurumq; pari sub sorte recenset.
Hæc cui nascenti dominantur Signa, futurum*

Vide pro-
his Gene-
thialogi-
cos.

Credat,

ZODIACI LIBER PRIMVS.

Credat, vt aut paucos gignat, vel morte premendos.

Signa recisa, duplicia, ac bicorporea.

Q*uid quòd Signa dabo quædã, pro parte, recisa?
Atque ex diuerso cõmissis corpore membris?
Testis erit Caper: & qui tentum dirigit arcũ
Iunctus equo: cui pars hominis, pars altera bruti est:
Nec Taurum excludes, postica parte carentem:
Queres quid monstrant, posthac ostendere pergã
Cum primum reliqua huius pluma absoluerò paucis.*

Signa muta, & loquacia.

M*uta manent Cancer, Pisces, & Scorpio, Libra:
Sed nonnulla sonos, nullo monstrante, reponunt:
Vt caput armenti Taurus: pecorisq; superbus
Rex Arius: sæuisq; Leo, necnon Capricornus.
Cætera, sermonis, vocisq; capacia sunt.*

Signa currentia.

N*E tu (quæso) putes in eo cõmentã dedisse
Naturam rerum, quòd sint currentia Signa:
Vt Leo, & Arcitenens, necnon & Laniger: illa
Nil tentat frustra: spectatque per omnia finem:
Vt mox exponam, facili adspirante Minerva.*

Signa fessa & pigra.

S*unt quæ fessa sedent pigras referentia mentes:
Vt Taurus, positus collum demissus aratri:
Et Libra, atque Caper contractus frigore sursum.*

Signa iacentia.

P*rocumbit Cancer regradarius, ac iacet: estq;
Scorpius huius similis, metuendus vulnere: Pisces*

AUTORE ANTO. MIZALDO.

In latus obliqui recubant,ceu morte sepulti.

Signarecta.

Quadam recta suis librantur sidera membris:
Vt Libra, Gemini, fundens & Aquarius undas.

Signa membris fraudata, siue imperfectorum membrorum.

Si tu solerti circumspicis omnia cura:
Fraudata inuenies nonnullis sidera membris:
Scorpius in Libra consumit brachia: Taurus
Cernitur incuruo claudus pede: lumina Cancro
Desunt: Centauro superest, & quaritur vnum.

ADMONITIO in superiora, pro illorum
significatione.

Avdisti vt cælum (mundi terrestris imago)
Concisos, steriles, scandentes, atque cadentes,
Mutos, ac duplices, currentes, atque iacentes,
Insuper, & fessos, prostratos, denique nudos,
Necnon fraudatos membris, pigrosque, loquaces,
Atque imperfectos, variè capiâtque, gerâtque:
Id dum cognoscis, dum spectas, disce libenter
Quòd nostros casus solatur mundus in astris:
Exemploque docet constanter singula ferre:
Ac vitium cuiusque animo tolerare modesto:
Omnis cum à cælo fortuna pendeat ordo.
O rem, ter, quater excelsam? ò miracula mira
Cælorum? ò magnum artificem, summumque magistrum,
Et doctum? sacris digitis qui cuncta notauit
Sursum, discipulos vellet quæ nosse deorsum:
Hoc studio quid (quæso) dabis diuini? aut quid

Philoso-
phica sū-
ma lectio-
ne & admi-
ratione di-
gna.

Rerū cœ-
li studium
planè di-
uinum.

Optandum

ZODIACI LIBER PRIMVS.

*Optandum magis id tenues queramus, & ampli:
Nam æquè pauperibus prodest, locupletibus æquè:
Æquè neglectum pueris, senibûsque nocebit.*

Signa in Zodiaco hærentia, ac se contingentia:
adhæc conuenientia, & dissentientia: cum his
quæ deorsum præmonstrant, ac significant.

Philoso-
phica, &
egregia.

IN cælo nulla est hærentibus addita Signis
Gratia: nam consensus abest, quia visus ademptus.
Si fortasse cupis quæ sunt hærentia nosse:
Hærent perpetuè maribus muliebria: sicut
Lanigero Taurus, Geminis Cancer: tibi nota
Cætera sunt: mundo supero quibus est amor, & pax
Suspecta: ex sexus natura, parte, locoque:
Quorsum? nimirum vt discant homines bene nati,
Quòd sunt, & sexu, & studiis, & moribus, atque
Votis disparibus, totum sociata per orbem
Mascula fœmineis, naturæ lege vetusta:
Scilicet hinc rixæ, & discrimina: quod (precor) vnum
Cônubio iuncti videant, & credere cælo
Incipiant: in quo est Diuûm depicta voluntas:
Ast hominum nullis opibus mutabile fatum est:
Nec frustra, non sunt etenim venalia fata.
Queis Deus imponit leges, ac imperat, vt vult.

Fata non
esse vena-
lia.

Signa aliquot gemina, & bina in cælo esse, non
absque causa.

Duo Si-
gna in cœ-
lis bina,
seu gemi-
nata.

VErè, Signa dabunt quadam geminata, potenteis
Per socium effectus: multum comes instat, agitq;
Ad pacem bellumque: duos per sidera Pisces,
Necnon Tyndaridas nudatis aspice membris:
Queis coniuncta manent alterno brachia nexu:

Consimi-

AUTORE ANTO. MIZALDO.

Consimiles forma, & numerus par, par quoque corpus:
Ac ætas eadem, & vires, studiūque, modūque:
Atque hæc ex paribus toto gaudentia cælo
Signa vides: nihil exterius miramur in illis:
Ni quòd cœlestis mundus demonstrat ad vnguem,
Cum paribus debere pares traducere vitam:
Ac similem simili sociali fœdere iungi.

Philoso-
phica

Signa quædam in Zodiaco nuda esse: & quid
inde mundo inferiori significetur.

N V datibi ostentat cælum, & pauperrima Signa,
Vrignerū, ac Geminos: queis nō est vestis, abestq;
Calceus, aut velum: nec frustra: vt discere pergas
Paupertatis onus patienter ferre: patique
Quidquid adest, statuūque tibi Diuina potestas:
Quæ cælum ante hominem formauit: vt esset imago
Cunctorum quæ vellet ei demittere: vellet
Nota prius fieri, quàm sint illapsa deorsum:
Nam leuius lædit quidquid prævideris antè.
Hinc sursum librum scripsit, pinxitque tabellam
Illorum quæ sunt, & erunt, olūmque fuerunt:
Duntaxat notam prudentibus, atque peritis:
Qui non vt porci, vel iniquæ sortis aselli,
Obstipo vultu tellurem semper adorant:
Sed sursum spectant: mittūntque ad sidera recti
Sidereos oculos, ac se scrutantur in astris:
Tantò maiores, quantò maior a sequuntur.

Pulchra
de Signis
duobus in
cælo nu-
dis.

Sūma laus
& fœlici-
tas cœle-
stium Ph
ilosopho-
rum.

FINIS LIBRI PRIMI ZODIA-
ci, siue Hortuli Duodecim Signorum
cœlestium, Autore Antonio
Mizaldo Monluciano.

LIBER SECVNDVS ZO- diaci, seu Hortuli duodecim Si- gnorum cœlestium, autore Anto. Mizaldo Mon- luciano.

Quid signum in vtroque Sphæræ situ, rectè, vel obli-
què oriri, & occidere: siue ascendere, & descendere.



*Ecce oritur Signum, cum quo pars
Aequidialis
Ascendit maior: cum quo verò mi-
nor, illud
Obliquè scandit, similis descensus
habetur.*

Signorum ascensiones, & descensiones, siue astro-
nomici exortus & occasus in recta Sphæra.

S Igniferi quarta de punctis Solstitorum
Nec non Aequantis venientes (vt petet ordo)
Ascensus & descensus retinere feruntur
Aequales: sed ibi partes variare memento
Illarum medias: veluti te ars ipsa docebit:
Quæ non permittit complecti singula versu.

Vide pro
his erudi-
torum Cof-
mogra-
phias.

Signa tardè, & velociter ascendentia, ac descen-
dentia in obliqua Sphæra & decliui.

R Ecce meant, obliqua cadunt à sidere Cancrī,
Donec finitur Chiron: sed cetera Signa

Nascuntur

AVTORE ANTO. MIZALDO.

Nascuntur prono, descendunt tramite recto.

Signa sex quouis tempore supra terram esse, & totidem sub terra.

S*Vpra tellurem quantus consternitur arcus
Cœlorum, tantus proponitur esse sub illa:
Sex quavis hora producens sidera sursum:
Et totidem rursus occultans, retinensque deorsum
Per lucem, ac tenebras, omni regione locoque.*

Signorum exortus & occasus, siue apparitio, & occultatio triplex: iuxta poeticam & vulgare acceptionem.

Dimidiū
cœlum su-
pra sem-
per, & in-
fra esse.

S*Ignorum occasus triplex censetur, & ortus:
Cosmicus, heliacus, necnon & acronychus: ortus
Cosmicus, ac occasus erit, dum in climate quouis
Sole oriente, aliquod Signum consurget heoa
De regione simul: vel tum se merget in vndas.
Dicitur acronychus quoties surgitue, caditue
Signum aliquod, cum primū alto se gurgite condens
Titan, permittit stellas splendescere cœlo.
Heliacum vocitant ortum, cum Sole propinquo
Signum occultatum (Phæbo sensim subeunte
Vicinum) properè nobis sua lumina reddit:
Occasum contrā, quoties Sol vndique Signum
Obtenebrat splendore suo: prohibetque micare:
Cetera percurrā quando tractabo Planetas:
Si fortuna volet, studiis malè prouida nostris.*

Exortus &
occasus Si-
gnorū cos-
micus.

Acrōny-
chus.

Heliacus.]

Signorum, & partium Zodiaci aspectus inter se, nec-
nō radiationes. Et primū de quadrangulāri aspectu,
deinde triangulāri, cum vtriusq; natura & viribus.

N*Vnc tibi Signorum aspectus proponere pergo: Quid aspē
Qui nil quidquā aliud sunt, quā distantia certa et Signo-
rum.*

ZODIACI LIBER SECVNDVS.

Signorum inter se, aut (si vis) radiatio quadam.

Quadrangularis. *Ergo, si aspectus optas numerare quadratos:*

Diuide Zodiacum totum per Signa quaterna:

Triangularis.

Aut tria, si explorare voles fortasse trigonos.

Heic, Signum quoduis extremum, prospicit ipsum

Primum: cui socias vires committit, & addit

Ad pacem, aut bellum: veluti monstrare studebo,

Quando cœlestes satagam celebrare Planetas:

Et mundi fœdus quæram, litèmq; per astra.

*Signorum aspectus sexangularis, siue sextilis, &
hexagonus: cum propria illius natura & viribus.*

**Aspectus
sextilis.**

I*nsunt alternis passim commercia Signis,*

Sextili aspectu sanctam seruantia pacem:

Si minus ex toto, saltem pro parte propinqua:

Mascula sic maribus respondent: cetera sexus

Fœminei sic se iungunt, & pace fruuntur.

Ergo, si in senas parteis diuiseris ipsum

Signiferum, aspectus fiet qui sextus habetur.

Signorum aspectus oppositus, & eius natura, ac vires.

**Aspectus
opposit⁹.**

S*cis quòd Signa micant variis ex partibus, vnum*

Per medium mundum opposito tendentia vultu:

Septima quæque loco quannus longinqua feruntur,

Se tamen oppositè aspiciunt, virésque ministrant

Ad rixam bellumque suas, cœlo vt placet alto:

Nunc Phœbo & stellis rabidas dictantibus iras:

Nunc rabiem, fœuūque malum frangentibus iisdem.

*Signorum oppositorum nomenclatura, cum par-
tibus anni quæ illis respondent.*

H*ic si fortè libet quæ sint contraria Signa*
Per titulos recitare suos, sed èsque: memento

Morbi-

Morbiferum Autumnum florenti opponere Veri:
 Et rigida Brumæ cerealia tempora: dico
 Libram Lanigero: Capricorno denique Cancrum:
 Piscibus Erigonen: Iuuenique, Vrnaque, Leonem.
 Scorpius è summo cum fulget, Taurus in imo est:
 Dum cadit Arcitenens, Gemini tolluntur in altum:
 Et contrà: oppositus Signorum sic meat ordo.

Opposita
 Signa.

Signa opposita, quando, & quomodo amica, vel
 inimica dicenda.

S Int licet ex positu in cælo contraria Signa:
 Naturâ tamen interdum sociata feruntur:
 Quod sic demonstro: Pisces & Virginis astrum,
 Quanquam aduersa volent, seruant communia iura,
 Et vincit natura locum: sed vincitur ipsa
 Temporibus: sic tu Cancro, Capricorne, repugnas:
 Fœmina fœmineo: quia Brumæ dissidet Aestas.
 Sunt illinc glacies, niuibûsque albertia rura:
 Hinc, sitis, & sudor, mortales vsque fatigant:
 Sunt illinc luces minimæ, noctesque profunda:
 Hinc, prolixa dies, ac nox brevis, & propè nulla:
 Ergo, si posthac homines, aut regna videbis
 Opponi, pugnare quoque, & contraria velle:
 Tolle oculos sursum, nec quid mirare, patebunt
 Stellato in cælo (naturæ si modò prudens
 Observator eris) quæ deorsum stantque, vigentque.
 An non Lanigeri Signum, libræq; repugnant
 Parte aliqua? non Ver, Autumnus à tempore differt?
 Fructibus hîc turget maturis, floribus illud:
 Hic, siccescit iners, illud, frondetque, virêtque,
 Conueniunt, quod habent similes noctesque, diesq;
 Temporâque efficiunt vno concordia textu:

Signorum
 quorundâ
 collatiões
 penes simi
 litudinē &
 dissimili
 tudinem.

Philoso
 phica &
 pulchra.

Ver & Au
 tumnus.

ZODIACI LIBER SECVNDVS.

Atque dies pariunt medios hyemem inter, & æstum.

Signa dextra & sinistra, ex quibus aspectus tam dextri, quàm sinistri colliguntur.

Signa priora, tibi sint dextra, læua sequantur:
Dexter Lanigero Arcitenens est: & Leo læuus.
Dexter erit Tauro Capricornus, Virgo sinistra.
Pisces sunt Geminis dextri, Libra est quoque læua:
Id satis exempli, nam per te cætera disces.

Signorum inimiciæ & cõcordiæ penes aspectus, iuxta vulgatum Astrologorum modum.

Oppositis Signis odium est: quæis iunge quadrata:
Tolle trigona, simul sex angula, nam sibi constant
Totâ Signorum naturâ, parte vel vna:
Discordant reliquâ, ex vario nexûque, modoque.

Signorum Zodiaci partes, octo & viginti, à pri-
scis Astronomis Lunæ mansiones, siue peragra-
tiones inscriptæ: quarum supputatio ad hæc tẽ-
pora, fideli calculo accõmodatur: cum auræ com-
motionibus quas cient plurimum.

Tractus
Zodiaci

octo & vi-
ginti, qui
Lunæ mæn-
siones to-
tidem con-
stituant.

Primus.

Secūdus.

Tertius.

Vna habet in Signis octonos & decies bis
Tractus, quos peragrans, diuersis motibus (vt sunt
Natura illorum) seu spectes aera, siue
Aequor, tellurem, necnon & corpora nostra,
Miris vsque modis agit, conturbat, & vrget.
Primus, Lanigeri vigena à parte, recurrit
In trinam Tauri: & siccus censetur abunde:
Inde, secundus ab it Tauri ad sextam decimamque:
Et passim Astronomis exponitur humidus esse.
Tertius, eiusdem (lentè satis) vltima ferme
Calcat: ei que datur meritò natura prioris.

Hinc

<i>Hinc petit undecimam quartus fratrum Geminorum:</i>	Quartus.
<i>Quem poteris siccum, vel summo iure, vocare.</i>	
<i>Quintus ab hoc properans, vigenam tangit eorum</i>	Quintus.
<i>Cum quarta: cui temperies narratur amica.</i>	
<i>Ostipedis Cancris septenam sextus, & ultra</i>	Sextus.
<i>Illinc assequitur, fundendis imbris aptus.</i>	
<i>Septimus, eiusdem ad vigenam extenditur, atque</i>	Septimus.
<i>Temperiem (ut quidam tradunt) nebulasve ministrat.</i>	
<i>Hinc octauus adit, saevi, rapidique Leonis</i>	Octauus.
<i>Ternam: quam siccum tempus comitarier aiunt.</i>	
<i>Illinc, eiusdem sextam repetit, decimamque</i>	Nonus.
<i>Nonus, aquas variis spargens regionibus: à quo</i>	
<i>Se confert decimus fermè ad postrema Leonis:</i>	Decimus.
<i>Hic ubi temperiem, vel siccam nuntiat auram.</i>	
<i>Virginis undecimus tenet hinc partem duodenam:</i>	Undeci-
<i>Siccus nonnullis, aliis humore madescens:</i>	mus.
<i>Qui post hunc surgit, vigenam Virginis, atque</i>	Duodeci-
<i>Quartam consequitur, cui multi temperiem dant.</i>	mus.
<i>Tertius & decimus, Librae hinc spaciatur adusque</i>	Decimus
<i>Octauam: cui saepe dato humores mediocres.</i>	tertius.
<i>Quartus cum decimo, in vigenam prosiliit illinc</i>	Decimus
<i>Eiusdem: humentem dicunt, siccam esse putamus.</i>	quartus.
<i>Mox decimus quintus se ad ternam porrigit inde</i>	Decimus
<i>Scorpi: qui friget satis, estq; humore molestus.</i>	quintus.
<i>Cum sexto decimus, petit hinc sextam decimamque</i>	Decimus
<i>Ipsiusmet: habetque undas persaepe propinquas.</i>	sextus.
<i>Septimus & decimus concedit ad vltima Scorpi</i>	Decimus
<i>Illinc, per crebro siccis comitantibus auris.</i>	septimus.
<i>Inde Sagittiferi recta meat ad duodenam</i>	Decimus
<i>Cum decimo octauus, pluuiis quandoque refertus.</i>	octauus.
<i>Hinc ad quintam & vigenam, nonus decimusque</i>	Decimus
	nonus.

ZODIACI LIBER SECVNDVS.

Vigefim⁹. Serecipit: satis atque satis pro tempore siccus.
Ex hoc, bis denus complectitur Aegocerotos
 Septenam: sudum faciens humore remixto.
Vigefimus *Vigenam eiusdem vigefimus occupat atque*
primus *Primus, profundens partim sicca, humida partim.*
Vigefimus *Moxque secundus ab hoc, nec non vigefimus, usque*
secundus. *In ternam Hydrochoi pergit, pluviasque ministrat:*
Vigefimus *Ad decimam hinc sextam vigenus trinus oberrat:*
tertius. *Cui dant temperiem, & paruo cum frigore lympham.*
Vigefimus *Qui sectatur eum, ad postrema recurrit Aquarij:*
quartus. *Siccum nonnullis, aliis madidum aera reddens.*
Vigefimus *Hinc, Pisces quintum vigenumque, ad duodenam*
quintus. *Mensurant: cui sunt comites crebro vnda, madorque.*
Vigefimus *Inde abit ad quartam & vigenam, sextus, abundans*
sextus. *Supra vigenum, siccus, pluviusque frequenter.*
Vigefimus *Proximus in partem septenam extenditur usque*
septimus. *Lanigeri: nunc hoc, nunc illud tempus ad augens.*
Vigefimus *Octavus supra vigenum, ac ultimus, implet*
octavus & *Curriculum Luna peragratis undique Signis:*
ultimus. *Nam redit ad tractum ex quo primum coeperat ire:*
Hic ubi temperiem facit, ac siccum aera prebet.

ADMONITIO in præcedentia, non negligenda.

Dum Phæbe Soli, aut reliquis coniungitur astris:
 Vel valido aspectu illorum commercia quarit:
 Quales dicentur tractus quos tum peragrabit:
 Aeris expectanda venit commotio talis:
 Si stella simili de Signo, ac parte fauebunt:
 Ni tum causa potens aliunde obstatque, vetetque:
 Quam docti Astronomi, paruo, facilique labore
 Expedient: quod ad aspectus etiam potes omneis
Stellarum

Hæc sum-
 mopere, p
 cōmotio-
 nib⁹ aeris
 notanda
 sunt.

AVTORE ANTO. MIZALDO

Stellarum inter se, prudenti aptare Minerva.

Signum Zodiaci à quo Ver Astronomis initiatur:
cum pulchra ipsius Veris descriptione ac natura.

L Aniger, ad Cancri properantem tectula Phœbum, Ver quan-
(Dum redit à Capro, & cōmutat frigus in æstum,) do auspi-
Inter principium ascensus, finemque coerces: cetur.

Hic ubi Ver reuehit, victumque ad sidera Brumæ,
Vincerite diem facit, & succumbere nocteis.

Tunc varios satagit flores emittere tellus:

Tunc noua gemma tumet grauido de palmitè Bacchi:

Tunc pecudum, volucrumque genus per pabula leta

Incumbit proli, & Veneri: totumque canora

Voce nemus resonat: frondemque virescit in altam:

Tunc cælum ridet: tunc lapsas vsque reponit

Sylua comas: veteresque canit philomela querelas:

Floribus ornatæ crines per prata Napeæ

Deducunt choreas: Dryades, Satyrique petulci

Carmina muscosis iterant lasciuia sub antris:

Viribus in tantum cœli natura mouetur.

Signum Zodiaci à quo Aestas Astronomis ini-
tiatur, cum pulchra ipsius Aestatis descriptione,
ac pictura.

P Hæbus ad ardentis veniens fastigia Cancri,
Extendit lucem summam, paruoque recessu
Destruit: & quanto hanc defraudat tempore, tanto
Prolongat nocteis, donec videat Capricornum.

Tunc æstum nobis perfert sudore molestum:

Tunc Cererem fragili properat distringere culmo

Messor: tum pelagus calfactis æstuat vndis:

Tunc & bella fero tractantur Marte cruenta:

Inque Canes rabiem ducuntur, & omnia feruent:

Multa-

Pulcher-
rima Veris
descriptio

Aestas ubi
auspice-
tur.

Pulcherri-
ma Aesta-
tis descri-
ptio.

ZODIACI LIBER SECVNDVS.

*Multiáque pro sterili conduntur tempore Brumæ:
Aurea mala, nuces, fruges, pira, carea pruna,
Necnon caseoli, vestes, mel, amigdala, ficus,
Herbæ, flores, ligna, legumina, denique quiduis.*

Signum Zodiaci à quo Autūnus initiatur: cum
propria ipsius Autumni descriptiōe ac pictura.

Autūnus
quādo au-
spicetur.

Libra diem socians equali tempore nocti,
Cum primum vidit clarissima numina Phœbi,
Et iussit victas vsque ad se, vincere nocteis,
Pestiferum Autūnum miseris mortalibus adfert:
Quo, modò frigoribus premimur, modò soluimur æstu:
Aeréque incerto, morbis ac peste grauamur.
Tunc Liber grauida descendit gratus ab vna:
Dulciáque expressis despumant musta racemis:
Tunc ad aratra boues veniunt, dum terra tepore
Autumni resoluta patet: dum semina captat.

Pulcherri-
ma Autū-
ni descri-
ptio.

Signum Zodiaci à quo Hyems auspicatur, cū
propria ipsius Hyemis descriptione ac pictura.

Hyems
quādo au-
spicetur.

Horrifer, his oris, Brumæ Capricornus inertē
Per minimas stringit luces, & maxima noctis
Tempora: sed tamen ille diem producere tentat
Sensum: pro Solis motu, Signique recessu.
Tunc riget omnis ager, clausum est mare, castra sepulta:
Tunc homines latitant, necnon genus omne ferarum,
Frigoribus nimis cælo, terræque refusis:
Vnde per Æstatem partis tum rite fruuntur,
Vt formica: pigros hac passim voce laceffens:
Æstas non aderit semper, conquirite grana,
Dum tempus cereale viget: citò præterit illud.

Pulcher-
rima Hie-
mis descri-
ptio.

Ipsa quoque his anni clauduntur tempora Signis:
Signa tria dictis tempestat. deputari.

AVTORE ANTO. MIZALDO.

*Sunt. Aries, Taurus, Gemini, tria sidera Veris:
Aestatem Cancer, Leo trux, cum Virgine complent:
Scorpius Autūnum, & duplici cum Lance, Sagitta:
Deinde Hyemi Pisces, Capricornus, Aquarius adsunt.*

Triades
quatuor
anni tēp
statum.

Ab Ariete, siue ab Aequinoctio vernali, gentes
plerasque suum annum olim inchoasse.

Quidam (si nescis) post frigida tempora Brumæ,
Cum premit auratos Nephelæi velleris artus
Phœbus: & imbriferū rediit Ver: oīa quādo
Floribus arrident: quando omnis germinat arbor,
Cum viret omne nemus, resonant dum frondea rura
Concentu volucrum vario, pecudēsq; fereq;ue
In venerem exultant, & amor, venit omnibus idem,
Hinc anni ingressum statuere, & limina prima.

Veris na
tura.

A Cācro, siue ab æstiuo Solstit. gēteis plērāsq; &c.

Sunt apud antiquos, qui è summo culmine cœli
Quā regnat calor, & vectores Phœbus anhelos
Sistit carceribus positis, exordia prima:
Anni surgentis fecere, ac atria prima
Nam tum flaua Ceres, necnon Pomona triumphant:
Ec latè omniferis ditescit mundus ab aruis.

Aestatis
natura.

A Libra, siue ab autūn. Aequinoct. gēteis plērāsq; &c.

Nonnullos dabo, qui qua brachia parte reponit
Signiferi, chelāsque audaciū exerit, acer
Scorpius, hic, anni primos aditus statuere,
Et primam fecere viam: nam partibus aquis
Distribuit lucem, atque umbras Sol optimus illic:
Ac noctem paribus suspendit vbique diebus:
Ad des, quod tellus prolatis fructibus, atque
Omnigenis granis, Bacchi cellaria complet:

Autūni
natura.

Vnde

ZODIACI LIBER SECVNDVS.

Vnde fluunt risus, & pauper cornua sumit.

A Capricorno, siue à Solstitio hyberno, gentes
plerasque &c.

Hyemis
natura.

AT Numa, frigoris per iniquū tempus (vbi ingēs
Declinat cælum, & gelidum Sol Aegocerotæ
Pronus adit, pronoque petit spacia vltima cursu,
Linquens Antipodum sedes, festinus & Austro
Ad Boream ascendit sinuoso calle. diēque
Auget, & obscuras nocti tum surripit umbras)
Anni principium Romanis adidit olim:
Quod tunc terra suos fœtus emisit omneis:
Atque novos reparct, stellis, cœloque fauente.

Signa Zodiaci cum suis Planetis, quos ventos
excitent secundum nonnullos.

Signa i-
gnea quos
vētos ex-
citent.

VEntorum flatus variant, variantibus astris:
Ignea præcipitem Boream, & rigidissimæ claustris
Arctois flabra emittunt, glaciēque, niuēque:
Sæpe tamen vicino Aries de tramite Cauros
(Immissum Zephyro, ac Boreæ genus) euocat antris.

Aquea.

Humida Signa etiam humentes referentia flatus
Oceani, occiduos motus, auramque Fauonij
Sollicitant: tamen & Libycis procul excita arenis
Flabra cient, Zephyro translata frequēter, ad Austrum.

Terrea.

Sic plarisque Notum, terrestria Signa refundunt:
Et nimis ingrato nobis afflamine perflant:

Aerea.

Ast, Eurūque, Eurique domos, Nabathæaque regna
Aeris agnoscunt, & habent tria lucida Signa:
Si Luna, & proprij conspirent rite Planeta.

Signis Zodiaci, septem mundi climata subiici,
& ascribi: propriosque ibi Planetas duces, acre-

tores

AVTORE ANTO. MIZALDO.

Stores habere: quorum naturam subdita climata
plærunque referunt.

Astronomi veteres terrestria climata septem,
Signis Zodiaci tribuerunt, ordine tali:
Vrñigero primum celsit, necnon Capricorno:
Cui dux præficitur Saturnus siccus & exlex.
Cheirona & Pisces narrant spectare secundum:
Iupiter est dominus, gemmarum dives, & auri.
Tertium habere Nepam dixerunt, Lanigerumque:
Cui Mars imperitat, bellis & sanguine notus.
Quartum rite Leo prisco sibi fœdere iungit:
Pro rectore tenēs Phœbum gravitate verendum:
Taurus cum Libra quintum petiēre regendum:
Atque ducem Venerem, luxu, pompæque fluentem.
Iure bono sextum Geminis, ac Virgine gaudet:
Ductor Mercurius, mercis, linguæq; magister:
Postremum Cancer solus sibi vendicat: atque
Agnoscit Phœben dominam, subitâque, leuēque:
Qualis erit rector, subiectos credito tales.

Signis Zodiaci, ac itē Planetis, certas orbis ter-
rarum regiones subiici. Ex quo, tot & rerum, &
figurarum varietates, ac particulares propieta-
tum distributiones emergere solent.

Rite Deus mundum in parteis diuisit, & astra
Cuique dedit parti cum summo iure: tulitque
Vt terras alias aliud sibi vendicet astrum:
Scilicet hinc varium genus est hominum, variæq;
Leges, & varia mentes, variæq; figurae:
Adde sonos totidem vocum: totidem insere linguas:
Et mores pro sorte pares, ritusque locorum:
Adde genus varium, simili sub semine, frugum:

Et Cererem

Vnde tāta
varietas in
rebus hu-
manis, &
naturæ.

ZODIACI LIBER SECVNDVS.

*Et Cererem varia redeuntem messe per orbem:
Ac Bacchum grato dantem sua munera gustu:
Atque alias aliis fundentem collibus vvas:
Adde feras, variis genitas formisque, locisque:
Necnon & gemmas, & fructus, atque metalla:
Quæ varias vireis retinent, variisque colores.
Ex quo, crediderim rectè scripssisse vetustos,*

*Pulchra,
& notatu
dignissi-
ma.*

*Quod cælum passim producit, non ager: & quod
Inferiora vigent radiis moderata supernis,
Ac proprium sidus sortitur qualibet ora.
Scilicet hinc omnes terræ, non omnia possunt:
Atque hîc sunt segetes, ibi cinnama, pascua, flores,
Arborei fœtus alibi, lapidesque, feraq;
Nam cælo natura subest, cælo omnia parent.
Ergo, sunt ascripta locis variis, varia astra.
Lumine quæ & motu moderantur subdita, quorum
Ista tibi paucis dabitur numeratio prisca.*

Signo Arietis subditæ regiones, ex priscorum
nomenclatura.

L *Anigerum in primis veneratur tota Propontis,
Et Syria gentes, & laxo Persis amictu:
Necnon Aegyptus, cui hærentes iungito terras.*

Signo Tauri subditæ, &c.

T *Aurus habet Scythiæ tractus, Asiâque potentem:
Et mollèis Arabas, Iudæa ditia regna:
Necnon & Cyprum, ac genteis, vrbeisque propinquas.*

Signo geminorum subditæ, &c.

E *Vxinus pontus Scythicas sinuatus in oras,
Sub Geminis te Phœbe colit, Gangésque profundus:
Quæis loca connumera vicino limite iuncta.*

Signo

AVTORE ANTO. MIZALDO

Signo Cancri subditæ, &c.

ARdent Aethiopes Cancro, quibus est calor ingens:
Quod color ipse docet: substernitur India Cancro.

Signo Leonis subditæ, &c.

TE metuende Leo Phryx suspicit: atque pauescit
Cappadocum, Armeniaq; ingis Bithynnia diues:
Te timet & Macedum tellus, quæ vicerat orbem.

Signo Virginis subditæ, &c.

Virgine sub casta celebris terræque, marique
Est Rhodus, Ioniaq; vrbes, & Dorica castra:
Arcades antiqui, celebratæque Caria famâ.

Signo Libræ subditæ, &c.

Hesperiam modò Libra tenet (quâ condita Roma)
Nec non vicinas genteis, populósque propinquos:
Ac Libyam, Aegyptique latus, cognatæque regna.

Signo Scorpij subditæ, &c.

THyrrbenas arceis tutatur Scorpius: vnam
Sardiniamque regit: fusasque per æquora terras.

Signo Sagittarij subditæ, &c.

GNosia Centauro tellus circumdata ponto
Paret: Trinacriam socio sibi fœdere iungens:
Quam sequitur Crete, sub eodem condita Signo.

Signo Capricorni subditæ, &c.

TV Capricorne tenes, quidquid sub Sole cadente
Est positum: gelidamq; Helicem quod tãgit: adoptas
Hispanos, celebresque animis, ac corpore Gallos.

Signo Aquarij subditæ, &c.

VNdas effundens iuuenili corpore Signum,
Cum Tyriis, Cilices, & proxima regna gubernat.

Signo

ZODIACI LIBER SECVNDVS.

Signo Piscium subditæ, &c.

Piscibus Euphrates seruit, Parthique fugaces,
Et Tigris, & rubri notissima littora Ponti.

ADMONITIO.

Si quis plura volet, poterit percurrere solers,
Quæ sunt à nobis in libro scripta secundo,
Quem nuper dedimus de visis crebrò Cometis:

Vide librū
2. Come-
tographiæ
nostræ.

Illic persequimur regiones, oppida, & vrbeis,
Quæ cuius parent Signo, vt sensere periti.

Signorum triplicitates fœdere tacito, cœlestia de-
creta omnibus regionibus quas subiectas habent
ex æquo cōmunicare. Adhęc, regiones regionibus,
vt Signa Signis alicubi conuenire, alibi dissentire.

Sic diuisa manet tellus per singula Signa:
A quibus in proprias terras sunt iura trahenda:
Namque eadem, quæ sunt Signis, commercia seruant:
Vtque illa inter se coeunt, odióque repugnant,
Nunc aduersa sibi, nunc & sociata decenter,
Sic terræ terris, arua aruis, vrbibus vrbes
Discordant, pugnāt, sociantur, conueniuntque:
Hinc erit & sedes fugienda, petendaque cuique
Hic modò, nunc alibi (vt Signum natale docebit)
Hic quærenda salus, & ibi metuenda pericla:
Nam quod inest terris, cœlo descendit ab alto.

Philoso-
phica &
summè no-
tanda.

Signorum Zodiaci decreta (vti etiam Planeta-
rum) ob regionum situs, ac naturas, plærunque
impediri ac mutari. Ex quo, varia locis variis
conceduntur, aliis negantur.

Nespernas terræ positus, ac flumina: & ipsos
Aspice arenosi tractus maris: aspice monteis

Montibus

AVTORE ANTO. MIZALDO.

Montibus impositos, & declinantia in imas
Conualleis loca: & acris superindita saxis
Oppida: non idem obtutus, posituraque cœli
Omnibus est eadem: nec Sol bonus omnibus idem:
Non similis natura soli, non ætheris aura.
Hinc variant mores, variat natura locorum:
Et tempestatum motusque, vicissique per orbem:
Vnde fit, vt pluuia nostrates, nix alibi sint:
Atque niues grando, tonitru ventus, pluuiaq;
Insuper agricola hic, nauta illic, armigerique,
Insignes alibi auriga, rabulaq; forenses
Vere nascantur: cœloque, soloque fauente:
Et sic de reliquis, ne sim narrando molestus.

Signa Zodiaci hominum membris attributa: &
quando morbos, aut vitia portant.

VT terras alias aliud sibi vendicat astrum,
Sic alias aliud de nostro corpore parteis,
Quodcumque id fuerit Signum, sibi iure reposcit:
Vnde Aries capiti, Taurus cernicibus hæret:
Brachia sunt Geminis: censentur pectora Cancro:
Te stomachus Nemeæ vocat, teque ilia Virgo:
Libra colit cluneis, & Scorpium inguine gaudet:
Arcitenens femore: & genibus Capricornus: aquarum
Fusor habet crura: & gemini vestigia Pisces.
Si malè fortunatus erit, languensue Planeta
In Signis istis, membrum quod subdiur, anget
Morbo, vel vitio, reliquis testantibus, vt fert
Ars: quâ sub cœlo non est diuinior vlla:
Sit modò circum spectè tractata, atque peritè,
Et non indocto lucrandi turpiter ausu.
Sed satis hæc, & fortè nimis: nunc scribere restat,

Locorum
positiones
& situs cū
cœlo ne-
gligi non
debere.

Partes hu-
mani cor-
poris Sig-
nis depu-
tata.

D

Quos

ZODIACI LIBER SECVNDVS.

*Quos mores animis nascentum Signa refundant:
Ne tibi me quidquam dicas voluisse negare:
Qui prodesse, fauere, iuuare, ac vtiles esse
Optavi semper: necnon cœlestia certos
Vsus ferre tibi, & gratis dare commoda mille:
Id quod præcipuum (cum multis) arbitror esse:
Non solum in rebus cœli, sed qualibet arte.*

FINIS LIBRI SECVNDI ZO-
diaci, siue Hortuli duodecim Signo-
rum cœli Autore Antonio
Mizaldo Monluciano.

LIBER TERTIVS ZO-
diaci, seu Hortuli duodecim Signo-
rum cœli, Autore Anton. Mi-
zaldo Monluciano.

Signa Zodiaci, suam pacem, suâque bella habe-
re: quemadmodum homines qui sub illis nascun-
tur: vbi de trigonorum conciliatione, & contrâ.



*At est, vt monui, Signis, & pri-
sca querela:*

*Quam sequitur mundus, qui cœlo
seruit vbique:*

*Ergo, si cognata cupis dignoscere
Signa:*

Et quid habent commune sub his fœtus bene nati:

Lanigeri partum proprio coniunge trigono:

Cui fœdus socium sociali tradito lege:

Simplicior tamen est Aries, meliôrque Leone:

Qui sub tenatos etiam, ô Centaure, libenter

(Præsertim qua parte refers hominem) colit, atque

Prosequitur: namque est naturâ mitius astrum:

Expositumque suæ noxæ, sine fraude, dolôque:

Nec minùs ingenio molli, quàm corpore constans:

Est aliis feritas ingens, prædaq, cupido:

Venalîsque animus, qui sæpe excedere cogit

Commoditate fidem: nec longa est gratia facti.

Est vbi Lanigeri partus cum fratre trigono

Non gaudet, sed crebra gerit pro tempore bella:

Quod feritas vtriusque parit, compellit, & instat:

Plus tamen in duplici tribuendum roboris esset

Signa ig-
nea quo-
modo in-
ter se con-
ueniant, &
dissentiat.

Hæc sunt
diligenter
adnotâda.

ZODIACI LIBER TERTIVS.

**Signa ter-
rea.** Cui commixtus homo est, quàm te, Nemeæ, sub vno.
 Quinetiam Tauri Capricorno iungitur astrum:
 Sed rarò sub eis coeunt ad fœdera mentes:
 At, qui Virgineos partus quocunque creabit
 Tempore, Taurinos amplexabuntur vbique:
**Signa.
Aerea.** Quosque ferunt Chelæ: & quos mittit Aquarius ortus,
 Vnum pectus habent fideique immobile vinclum.
 Magnus erit Geminis amor, & concordia summa:
 Magnus & in multos erit hinc successus amicos.
**Signa
Aquea.** Scorpius, & Cancer fraterna in nomina ducunt
 Ex semet genitos: necnon & Piscibus orti
 Concordant: illis sed sæpe est subdolus astus.
 Scorpius aspergit noxas sub nomine amici.
 Quæis porro in lucem Pisces venientibus adsunt,
 His non vna manet semper sententia cordi:
 Commutant animos, interdum & fœdera rumpunt:
 Ac repetunt, tectæque lues sub fronte vagantur.
 Sic erit ex Signis odium tibi, paxque notanda:
 Necnon dissimiles, similésue per omnia sensus:
 Hinc multos cernes (modò non sis fungus, & infans)
 Qui quosdam affectant, alios fugiuntque, timéntque:
 Horum odio, istorum contrà ducuntur amore:
 Illis insidias tendunt, captantur ab illis:
 Fratri bella gerunt, aliena sede creatis
 Coniunctos animos tradunt, seruántque per anum.

ADMONITIO in iam dicta.

Hic tutum non est solis insistere Signis:
 Contemplare locum cæli, sedémque πλανητῶν:
 Et quo se Signa aspectu videántque, petántque:
 Nam sua quadrato, veniunt sua iura trigono:
 Et quæ per senos decurrit virgula tractus,

Quæque

AVTORE ANTO. MIZALDO.

*Quæque secat medium transuerso limite cælum,
Huic modo dat firmam pacem, modò detrahitis illi.
Te reliqua Astrologi, vel me reticente, docebunt.*

Signa mobilia, quæ studia, quâsve artis & sensus
natis sub se concilient.

Signa quoque infausto sese spectantia vultu,
Mobilia Astronomis vulgari nomine dicta,
Dant varias animorum artis: nam prædita motu
Quæque cito, celeres sensus, agitâque longè
Ingenerant studia, & penetrabile mentis acumen:
Atque habiles ad laudem homines, ciuiliâque acta
Accendunt: quos cura Deûm, & solertia cæli
Permúltum quandoque inuat: sæpe his furor ille
Faticinus menteis ornat, panditque futura.

Nati sub
Signis mo-
bilibus.

Signa fixa quæ studia, quâsve &c.

Et curas animi tacitas, frontemque seueram,
Ac graue consiliis pectus rigidumque, tenâque
Iudicium, & non fictum verba sonantia verum,
Fixa dabunt: eadem argenti que, eadem amula honorum
Fomenta adiiciunt multis: hinc densa clientum
Agmina delectant: hinc & certamine in omni
Peruicisse volunt: commentâque pectoris, acri
Exponunt studio, atque operâ peragenda tenaci
Complent: queis defixa manet sententia cordi.

Nati sub
Signis fi-
xis.

Signa communia quæ studia, &c.

Quæ docti Astronomi vocitant communia Signa,
Instabilis reddunt animos, sensusque vagantis
Alternant: nil certum vnquâ variantia corda
Insequitur: non firma quidem est sententia: verum
Mens habilis: resque ad varias versatile pectus:

Nati sub
Signis cõ-
munibus.

ZODIACI LIBER TERTIVS.

Nunc amor, atque *Lyræ* studium, somnûsque, *Venûs*que,
Ociâque, ignavos reddunt, & pectore molli.
Sunt quandoque tamen rebus cœlestibus apti:
Ac musis scribunt, & *Phœbo* carmina digna.

Signum Zodiaci quodlibet, quas arteis particu-
latim, de propria natura ac imagine seorsum a-
gnoscat, & natis sub se, occultè conciliet.

Genethlia
logica bre-
uissima.

C *Urabit* lanas *Aries*, ac *Taurus* aratra:
Et *Gemini* musas: merces bene *Cancer* amabit:

*Nascetur*que *Leo* venator: *Virgo* magistra:
Libra potens veniet mensuris: *Scorpius* armis:
*Centaurûs*que feris: cursu *Capricornus*: & vndis

Notandū.

Fusor aquæ: *gemini* gaudebunt equore *Pisces*.
Si mixta in plureis sociantur sidera vireis,
Tunc alias arteis tribuunt: pro lege, modoque,
Mixtorum: quibus adiunges ex arte Planetas.

Signa cœli, & stellas, suas habere eclipseis, & lu-
minum actionûmq; ad certum tempus interce-
ptiones. Quod res mundi huius inferioris, quæ
ab illis pendent, experiuntur ac sustinent.

Accipe nunc etiam paucis, *ecliptica* Signa
Cœli: quæ certos quasi delassata per annos,
Nonnunquam cessant sterili torpentia luce:

Nihil ppe
tuū, & li-
bi semper
simile in
mundo.

Scilicet in toto nihil est durable mundo:
Perpetuûsque gerit vultus, vnûmque tenorem
Seruat: & in simili se præbet imagine semper.
Nunc fœcunda suis subsistunt frugibus arua:
Nunc solitos rennuunt fructus, ludûntque labores:
Rursum, quæ fuerant steriles ad semina terra,
Post, noua sufficiunt nullo mandante tributa,
Atque iterum in semet redeant: sic tempore certo

Signa

Signa suis spoliata iacent virtutibus, atque
 Lumine priuantur, rursus illustrantur eodem:
 Hoc patet in Luna (dum verè deficit) igne
 Orba sui fratris, noctisq; immersa tenebris:
 Cum medius Phœbi radios intercipit orbis
 Terrarum, impediens ne tanta luce fruatur,
 Nec trahat ad sese lumen, quo lucida fulget
 Cynthia: quapropter fusco velatur amictu:
 Et mundi sursum nigrò flet damna colore:
 Certè hîc Signa suo pariter cum sidere languent:
 Ac solitum ponunt pullata fronte vigorem:
 Et veluti extinctam Phœben in funere lugent:
 Quam vicina gemunt etiam, cognatâque Signa:
 Et quæ sunt illis ex ordine strata deorsum:
 Tantum conspirant cum summis infima semper.

Eclipsis
 Lunæ.

Affectis su-
 periorib⁹,
 inferiora
 affici.

Signum Arietis in alicuius natiuitate ascendens,
 vel Horoscopum constituens, quid plurimum si-
 gnificet per curriculum vitæ nati. Adhęc, quos il-
 li mores, & quæ studia appingat.

Nunc tibi diuersos mores, legēsque, notāsque,
 Ac studiū motus varios ex ordine pandam,
 Quos Signum quodcunque dabit nascentibus, ipsum
 Si ascendens teneat labentis tempore partus.
 Ergo, vbi se summis Arietis extollit ab vndis,
 Et ceruicē prior flexis quoque cornibus exit,
 Qui tum nascetur, vitali lumine gaudens,
 Non contenta suo gestabit pectora sensu.
 Ac dabit in prædas animos, soluētque pudorem:
 Ingenteis nunc diuitias cumulabit, opūmque
 Proferet vnd anteis riuos: nunc rursus in arctam
 Pauperiem miser excurrer: nam sideris huius

Natorum
 sub Ariete
 pictura.

ZODIACI LIBER TERTIVS.

Est mutare viceis, alternâque fata referre:
 Insuper, ignotum faciet transire per orbem:
 Scrutarique nouum pelagus: totius & esse
 Orbis in hospitio: testis tibi Laniger ille,
 Qui vitreum findens aurato vellere Pontum,
 Orbatumque suâ Phryxum per fata sorore
 Phasidos ad ripas, & Colchica terga reuexit.
 Mittet & in vulgum sic natus, mille per arctis
 Vellera, diuersos ex se parientia quæstus:
 Præterea discet (nisi quis pugnauerit illi)
 Conglomerare rudes, nunc rursus soluere lanas:
 Ducere nunc telas, & textas vendere vesteis.
 Astrologi reliqua exponunt: quos consule solers:
 Propterea quod habet cælum sua condita sacra:
 In qua non promptè quiniis penetrabit asellus.

Pro hisvi-
 de Argo-
 nautica.

Lanifici,
 & textor-
 es.

Signum Tauri in alicuius natiuitate ascen-
 dens, &c.

Natorum
 sub Tau-
 ro pictura

HI quos prima vident nascentis sidera Tauri,
 Semina mandabunt terris, & segnia rura
 Vomere proscindent: soluentq; in puluere pectus
 Prudens: nonne suo Dictator venit aratro?

Cur Tau-
 rus fœmi-
 neos gignit.

Illa eadem facient, maiorum natus ut omneis
 Perdat opes: sed eas longo post tempore, & ipsos
 Successus rerum amplificat: semperq; superbum
 Prosternit (si quis contrâ surrexerit) hostem:
 Verum fœmineos gignit, iustissima causa est
 (Si modò per causas cœlestia quærere fas est)
 Auersus venit in cælum, diuesq; puellus
 Pleiadum est Taurus: redolens muliebria passim.
 Addam, quod Veneris domus est, soliumq; Dianæ:
 Fœminei sexus quibus est data cura supernæ.

Signum

AVTORE ANTO. MIZALDO.

Signum Geminorum in natiuitate ascēdens, &c.

COelestes Gemini concordi fœdere iuncti,
Nonnullos natis ineunte atate labores
Portendunt: tamen haud illis pia cura parentum
Defuerit: nec blandus amor, nec amica voluntas:
Artibus imbutos decorant, sociantq; fideli
Principibus studio, quibus inseruire laborant:
Arma procul, lituósque volunt, ni concitet ardor:
Inueniunt & in astra vias, numerísque, modísque
Exornant artis: labor his fit mira voluptas.
Cantus præterea, modulataq; vocibus ora,
Ac docti calami, necnon lectíßima verba
Sunt cordi: ludiq; placent, placet insuper ingens
Discendi desiderium, ni accederet vna
Impar natura ingenio: tamen artibus apta.

Natorum
sub Gemi-
nis pictu-
ra.

Mathema-
tici, poë-
tæ, & mu-
fici.

Signum Cancri in alicuius natiuitate ascendens, &c.

MIgrans è claustris maternis partus in auras,
Si testudineus prætendit brachia Cancer:
Illi diuino promittit munere multa:
Diuitiæ primum ingentes, & copia rerum
Vndabit variarum, ac latis prædia campis
Sufficient latam Cererem, Bacchumq; fluentem.
Porro, nobilitas, & clavis insula vittis
Conferet insignes titulos, magnóque fauore:
Nonnunquam insidias cognati, ac sanguinis iram
Nuntiat, aduersósque inimica mente propinquos:
Ac varios tribuit quæstus, artémque lucrorum:
Merce peregrina victum captare per vrbeis,
Atque per ignotas commercia iungere terras,
Et rerum pretio subitos componere census
Cogit: zelotypos faciens, seuósque maritos.

Natorum
sub Cácro
pictura.

Mercato-
res, & in-
stitores.

Signum

ZODIACI LIBER TERTIVS.

Signum Leonis in alicuius natiuitate ascendens, &c.

Natorum
sub Leo-
ne pictura

CVi Leo vel primus rutilo fulgebit Olympo,
Magnus erit: celebris que feret præconia famæ:
Fascibus incumbet, multumque inhiabit honori:
Ac fiet diues, vigili, summoque labore:
Atque nouas pugnas, necnon noua bella per orbem
Inueniet: spoliis viuet, viuétque rapinis:
Ingenium ad subitas iras, facileisque recessus
Componens: sed erit sententia pectore firma:
Ille parente carens, & natis, quas habet amplas
Non legabit opes: sublatus fortè veneno,
Aut casus gladio, subita vel morte vocatus.

Morte re-
pentina
sublati.

Signum Virginis in alicuius natiuitate, &c.

Natorum
sub virgi-
ne pictura

SI dabit illustris Virgo incunabula vitæ:
Hæc quamquam duros sub prima ætate labores
Promittit: tamen in melius conuersa, beatæ
Cana senectutis largitur tempora natis:
Quos, & sacra Deum decorabunt: hisque fauebit
Vel decus ingenio partum, aut præstantia lingue:
Artibus aut variis excultum pectus ad vnguem:
Aut tabula extrema, aut merces peregrina, forumue.
His amor, his studium est recti, & vetus illa priorum
Simplicitas: his cara fides, pectusque Deorum
Nitens præsidio: his fient insomnia vera.

Ingenio-
si, & pi-
ctores.

Quid petis hæc vltra? Virgo castissima, mentem
Artibus exornat: nec tam compendia census,
Quàm causas, vireisque monet perquirere rerum.
Pictores fingit famam super æthera notos:
Necnon doctores legum, scribasque disertos,
Et mirè artifices: queis præstet littera verbum:
Quique notis linguam superent, cursumque loquentis.

Signum

AVTORE ANTO. MIZALDO.

Signum Libræ in alicuius natiuitate ascen-
dens, &c.

Sub Libra nati, nonnunquam pondera tractant:
Annonamq, vnguentaque, necnon munera Bacchi:
Sed variat fortuna, modo mutabilis omni:
Nam lasciui animum mores, & auara cupido
Insciunt: non est cordi sententia firma:
Splendida nec raris exurgit gloria factis:
Nunc aduersa fori disturbant iurgia: mille
Nunc lites, atque immeritis certamina causis.
In summa, nati sub Libra robore mentis
Sese confirmant: alios vincuntque ferendo:
Diuorumq, loca, & sanctissima templa frequentant.

Natorum
sub Libra
pictura.

Religiosi,
& patien-
tes.

Signum Scorpij in alicuius natiuitate ascendens, &c.

Quæ vitæ primam nascendo porrigit horam
Scorpius, ac huius reserat clausa ostia lucis:
Arteis inducit miras, & mentis acumen
Eximium: verum ira ingens, & pectoris æstus,
Ac varij exagitant motus: multumq, fatigant
Aduersa, & tamen hos fœlicia fata, potensque
Euentus manet: ac sobolis iucunda propago.
Atque vtinam non & patria tellure relicta,
Externas querant vrbeis: nec prima sepulchro
Pignora dent: pro illis magnos subeantque labores.
Scorpius (vt paucis verbis tibi plurima claudam)
Ad bellum ardenteis animos, & martia corda
Efficit, ac fuso gaudentem sanguine natum,
Nec præda, quam cede magis: cumq, optima passim
Pax agitur, volat ad sylvas, & lustra ferarum:
Atque hostem sibi disquirat, cum bella quiescunt:
Exspolians, ingulans, inuadens, atque trucidans.

Natorum
sub Scor-
pio pictu-
ra.

Bellicosi,
] grassato-
res ac py-
rata.

Signum

ZODIACI LIBER TERTIVS.

Signū Sagittarij in alicuius natiuitate ascen-
dens, &c.

Natorum
sub Sagit-
tario pi-
ctura.

IN cælo Cheiron quoties fulgentia primus
Ora effert, quicumq; nouas in luminis auras
Prodierit, quantum pelagi, & quot flumina obibit?
Quot terræ errantem excipient? quot perferet hosteis?
Et tamen insperata etiam patrimoniq; adibit:
Publicaq; insigni geret ille negocia cura:
Ingenio bonus, atque arteis edoctus honestas:
Errores porro varios, hostémq; potentem
Indicat: insidiásque, & multa pericula vitæ:
Nonnunquam sat agit celeres emittere currus:
Ardenteis & equos ad mollia ducere frena:
Ac latis armenta sequi pascentia campis:
Quadrupedum omne genus positis domitare magistris:
Exorare Tygres: rabiémque auferre Leoni:
Cúmque Elephante loqui: tantámque aptare loquendo
Artibus humanis varia ad spectacula molem:
Quippe fera mixtum est hominis per sidera corpus:
Vtq; intenta gerit curuato spicula cornu,
Sic venatores fingit, doctósque sagittæ:
Ac nervos tribuit membris, & acumina cordi:
Motus perceleres, & vix lassabile corpus:
Pectora clara mouens, bello, magnísque triumphis
Conspicuum, patrias victorem ducit ad adeis:
Qui nunc constituet, nunc condita mœnia vertet.
Quandoque, Arcitenens libris largitur, & arte
Cogere sub numeros verba, atque innectere chordis:
Noscere plantarum vireis, vsúmque medendi:
Et curare manu vulnus, verbísque leuare:
Ac sedare animos, & vincere dura ferendo.

Medici, &
chirurgi.

Signum

AVTORE ANTO. MIZALDO.

Signum Capricorni in alicuius natiuitate ascendens, &c.

Quem Caper exorians nascentem respicit, ille
Rem faciet: cumulat opes: sed sponte per orbem,
Visendi studio allectus, discurrat abunde:
Hunc amor in teneras stimulabit crebrò puellas,
Ac dabit imperiis dominæ: verum arida postquam
Deserit sitis, & longè exsatiata libido,
Languabit, multis odiis, ac verberè tundet:
Huic mens tectâ nimis premet altum corde dolorem:
Exteriùs monstrans aliud, quàm pectore claudat:
Vt tamen imponat populo, per templa frequenter
Errabit, superos simulata voce fatigans:
Nec satis hoc, Capricorne, homines perducis ad arteis
Ignis: nam quidquid nostros emittit in vsus
Vulcanus, poscîtque nouas ad munera flammâs,
A te procedit: scrutari occulta metalla,
Depositas & opes, terrâq; inquirere venas
Ostendis: quidquid carbonibus vsque paratur,
Quidquid & argento conflatur, quidquid & auro,
Hoc tibi de prisco deberi iure fatemur:
Tractas præterea feruentibus æra caminis:
Addis & in vesteis studium, mercémque fugacem:
Sed tibi sordities propria est, inflatâque sæpe
Mens stupet, & rerum obscura caligine pendet.

Natorum
sub Capri
corno pi-
ctura.

Hypocri-
tæ.

Ferrarij
fabri, sar-
tores, & a-
lij.

Signum Aquarij in alicuius natiuitate ascendens, &c.

Si quis habere cupit partum docilemque, probumq;
Is debet nasci cum primus Aquarius exit,
Oceani linquens vndas, terrâmq; salutans:
Namque bonas arteis solers tractabit: opesque
Inde sibi multas, fidôsque parabit amicos:

Natorum
sub Aqua-

Atque

ZODIACI LIBER TERTIVS.

rio pictu-
ra.

*Atque suis illinc meritis, magnóque fauore
Iunget amicitias primorum ex vrbe virorum:
Munera quinetiam scriptis commissa tabellis,
Sive Deúm in templis diuina negocia curans,
Sentiet inuidia vulnus, liuentiaque arma:
Hinc, & opes perdet, quas forti pectore fretus,
Ingenij donis, facili ratione reponet:
Cognatas etiam largitur Aquarius artis:
Venari pisceis, vndas inducere terris:
Ac varios fabricare lacus, & querere fonteis:
Paucis, quidquid aqua prestant, hoc prestat & ille.*

Piscato-
res, & a-
quarú cu-
ratores.

Signum Piscium in alicuius natiuitate ascendens, & e

Natorum
sub Pesci-
bus pictu-
ra.

Ille vnus, quem cœruleo de gurgite Pisces
Nascendo aspicient, Orientis in arce locati,
Ignotas vrbeis viset: longúmque vagatus,
Notescet peregre externis nouus aduena terris.
Quinetiam ingenioque valens, ac arte, per orbem
Magno erit in precio nonnunquam (fortè parente
Agresti natus) quo fiet, clarus vt ille
Ad maiora gradu conscendat munia certo:
Vix tamen inuidiam fugiet: quam franget, apertum
Vlciscens hostem facile, atque ex ordine, quemuis.
Interdum Ponti studiis capietur: amabit
Quidquid & in proprios pelagus desiderat vsus:
Flumináque, ac portus mundi perquiret, & orbem
Vndis lustrabit: connectens sidera Ponto:
Cognoscet ventos, naualiaque arma, sciétque
Huc modò, nunc illuc caligine vertere clauum:
Ac franare ratem, fluctúsque effindere canos:
Et placidum ductis euerrere reribus aquor:
Littoribúsque suis populos exponere captos.

Nautæ &
hydro-
graphi.

Signa

AVTORE ANTO. MIZALDO.

Signa Zodiaci humanos facientia, & contrà, &c.

Humanum Signum quotquot nascentibus, vltro
Ascendet, claros humanis moribus, atque
Mansuetos reddet: si brutum, siue ferinum
Difficiles, rigidos, tristes, sauos, & agrestes:
Et qui cum paucis, quàm multis viuere malint.
Quod nunquam fallet, si cœli rex, dominusque
Natalis, Signo in tali spectabitur esse:
Cetera de nostra disces quandoquē Mathefi.

Admonitio in præcedentia, & hætenus scripta:
quæ pro conclusione haberi potest.

Quisquis es, ô Lector, qui fructum carpere gestis
Ex his, te paucis iterumque, iterumque monebo,
Maturè vt videas labentis tempore factus
Signum quod scandit: necnon dominumque, ducemque
Illius: quis sit cum quo miscetur, agitq;
Felix, infelixne suo circumuolet orbe:
Ex quo deinde loco præsit, noceatue: quis hospes,
Quam teneat sedem, cuius sit cardinis: addes
Et reliqua innumera à priscis descripta: tibiq;
Vt fructum faciant gratis concessa, Deorum
Munere: quos curare hominum res, credere par est.
Plurima quæ restant scitu dignissima, paucos
Expediam ante dies: modò doctos ista probasse
Audiero: quæis posse placere, est gloria summa.

Hec vide-
ant Ge-
nethliolo-
gici.

Res nō fa-
cilis velle
seriò ex a-
stris philo-
sophari:
quod ani-
maduer-
tant impo-
stores ali-
quot.

FINIS LIBRI TERTII ZO-
diaci, & vltimi, autore Antonio
Mizaldo Monluciano.



Ob. 6. II. 3320

WITNESSES: JOHN, MRS. KID.

JOHN KID, of the County of ... State of ...

I, the undersigned, being a competent witness, do hereby certify that the within and foregoing is a true and correct copy of the original of the same, as the same appears from the records of the Court of the County of ... State of ...

Given under my hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.

Attest: My hand and the seal of the Court, at the City of ... this ... day of ... 18...

JOHN KID, Clerk of the Court.